

27



詩紀卷之二十七

晉七

陸雲二

與鄭曼季贈答八首

谷風

五章并序

陸贈

谷風懷思也君子在野愛而不見故作是詩言其懷思之也

習習谷風扇此暮春玄澤墜潤靈爽煙煜高山熾景喬木興繁蘭波清躍芳澣增涼感物興想念我

言
卷之十一
一
懷人

習習谷風載穆其音流瑩鼓物清塵拂林霖雨嘉
播有滄淒陰歸鴻逝矣玄鳥來吟嗟我懷人其居
樂潛明發有想如結予心

習習谷風以溫以涼玄黃交泰品物含章潛介淵
躍候鳥雲翔嗟我懷人在津之梁明發有思凌波
褰裳

習習谷風其集惟高嗟我懷人於焉逍遙鸞栖高
岡耳想雲韶拊翼墜夕和鳴與朝我之思之言懷

其休

習習谷風其音孔嘉所謂伊人在谷之阿虎質山
嘯龍輝淵蟠維南有箕匪休其和有球斯畢俾爾
滂沱懿厥河漢惟彼大華明發有懷我勞如何

鴛鴦

六章并序

鄭答

鴛鴦美賢也有賢者二人雙飛東嶽揚輝上
京其兄已顯登得朝而弟中漸婆娑衡門然
其勞謙接士吐握待賢雖姬公之下白屋洙
泗之養三千無以過也乃肯垂顧惠我好音

詩經 卷之十
思樂結永好之歡云爾

鴛鴦于飛在江之浹和音反暢拊翼雙起朝遊
蘭池夕宿蘭沚清風翕習扇彼蘭茝凌雲高厲
載翔載止

鴛鴦于飛載飛載吟有鬱浚藪實惟桂林芳條
高茂華繁垂陰爰翔爰翔爰憇其南有馥清芬
協我好音

鴛鴦于飛垂雲高翔有嚶其友戢翼未翔澹淡
素波容與趨倡雖曰戢止和音遠揚我有好爵

與子偕嘗

鴛鴦于飛徘徊翩翩載頡載頽命侶鳴群有鬱
蘭臯泐彼清源駕言遊之聊樂我云思與佳人
齊歡順川

鴛鴦于飛或飛或遊習習谷風扇彼清流春草
揚翹龜龜沉浮感物興想我心長憂誰謂河廣
曾不容舟企予望之搔首踟躕

鴛鴦于飛載和其鳴懷爾好音寡我中情人亦
有言心得遺形授我木瓜報爾瑤瓊匪絜日報

永好千齡

鳴鶴

四章并序

陸贈

鳴鶴美君子也太平之世君子猶有退而窮居者樂天知命無憂無欲碩人之考槃傷有德之遺世故作是詩也

鳴鶴在陰戢其左翼肅雍和鳴在川之側假樂君子祚爾明德思樂重虛歸于其極嗟我懷人惟馨黍稷

鳴鶴在陰其鳴喈喈垂翼蘭沼濯清芳池假樂君子其茂猗猗底之瑰寶有餐瓊瓌乃振袞裳襲爾好衣嗟我懷人啓襟以晞

鳴鶴在陰其儀藹藹謂天蓋高和音于邁假樂君子篤膺俊乂穆風潛烈興雲戢蒼德茂當年時衍嘉會安得擊藻改爾縞帶嗟我懷人心焉忼愾鳴鶴在陰載好其聲漸陸儀羽遵渚回涇假樂君子祚之篤生德耀有穆如瑤如瓊安得風帆深濯髣滅景遺雲雨爾在北冥嗟我懷人惟用傷情

蘭林

五章并序

鄭答

詩經 卷之七 四
蘭林歡至好也有君子世濟其美英名光茂
遭時暫否福德衡門顧我慙懃屢辱德音思
與結好以永不刊

瞻彼蘭林有翹有秀有斐君子邦之碩茂厥德
伊何固天攸授如川之源如山之富回流清淵
啓襟開裕縉紳晞風民用胥附

猗猗碩人如玉如金浚其明哲尅廣德心習習
凱風吹我棘林飛鴉萃至允懷好音悠悠征徒
輶德鮮任嗟我猗人和樂實忱

在昔延州鵠鳴江涯今我陸子曠世繼竒身垂
千載德音並馳漸鴻遵渚宛其羽儀安得高風

騰翮天池

飛龍蜿蜒山谷升氣猛虎嘯吟清風高厲情同
來感數乖身逝夷鮑齊歡專名故世愷悌君子
民之攸暨咨予邁時千載同愛

垂龔之會匪詩不宣嗟我懷人斯恩斯勤德音
來訊有蔚其文菽菽彘兔匪迹不存誠在心德
愛結忘言

南衡

五章并序

陸贈

南衡美君子也言君子遯世不悶以德存身作者思其以德來仕又願言就之宿感白駒之義而作是詩焉

南衡惟岳峻極昊蒼瞻彼江湘惟水泱泱清和有合俊又以藏天保定爾茂以瓊光景秀濛汜穎逸扶桑我之懷矣休音俊揚

穆穆休音有來爾雍沈波涌奧淵芳馥風僚虛養恬照日遺蹤考槃遵渚思樂潛龍我之懷矣冥爾

琴宮

和璧在山荆林玉潤之子于潛清輝遠振克稱軌德作寶有晉和聲在林羽儀未變我之懷矣有客來信

風雲有作應通山淵清琴啓彈宮商乘絃類族知感有命自天夷叔希世猶謂比肩矧我與子姤會斯年

我之懷矣在彼北林北林何有於煥斯文瓊瑰非寶尺牘成珍豐華非妙得意惟神河魴登俎遺答

清川

南山

五章并序

鄭答

南山酬至德也有退仕衡門修道以養和棄
物以存神民思其治士懷其德或思置之列
位或思從之信宿詩人嘉與此賢當年相遇
又屢獲德音情歡心至故作是詩焉

陟彼南山言采其蕭樂只君子邦家之翹克茂
厥猶輜德是收聊道以儉廣愛以周嗟我懷人
永好千秋

瞻彼江潭言釣其鱖有美碩人自公退處羔裘
逍遙輜德是舉白駒遯時世事孰與思我猗人
寘之晉序有客信信獨寐寤語

天高地卑玄黃煙煜人道交泰自昔先民耽文
合好輔德與仁管叔罕僑曠世難鄰脩組施結
玄弁生塵咨我與子遘會當身琴瑟在御永愛
纏綿

瞻彼江澳言詠其潭所謂伊人在水之陰養和
以泰樂道之潛錦衣尚綱至樂是耽興言永思

繫懷所欽愛而不見獨寐寤吟
詩以言志先民是經乃惠嘉訊德音惟馨欽詠
繁藻永結中情華文傷實世士所營達人神化
反之混冥交棄其數言取其誠思與哲人獨寶
其貞

高岡

四章

陸贈

瞻彼高岡有猗其桐允也君子實寶南江貞規啓
俗沉矩履方泳此明流清瀾川通陟彼衡林味其
回芳

馥馥回芳綢繆中原祁祁庶類薄采其芬栖遲泌
丘容與衡門聲播東汜響溢南雲
穆穆閭闔南端啓籥庶明以庸帝聽式闕有鳳于
潛在林栖翮非予之祚孰與好爵
幽居玩物顧景自頤發憤潛惟仞拂有思予美忘
此終然胥來企予與言惟用作詩

中陵

四章

鄭答

瞻彼中陵蘭英猗猗允矣君子樂且有儀沉仁
育物玄聰鏡機德充闡庭名逸南畿祁祁俊友

言酌言依

鼓鐘于宮百里震聲疊疊令問歸我偉貞厥震
伊何駿奔以驚厥問伊何民胥以寧有鶴在陰
非子誰鳴我有好爵非子孰盈

潛龍遯初有鳳戢翬王猶未恭彝倫錯違臯門
重闢資爾啓扉庶績適敷非爾焉綏翼翼京宇
俟爾攸晞民之胥望如渴如飢

德音來惠覆玩三周沉潤淵洞逸藻雲浮結心
所親曷變曷渝路隔津梁一葦限殊終朝之思

三秋是踰愛而不見興言踟躕

答孫顯世

十章

邈矣上祖垂休萬葉廣問弘被崇軌峻躡高山克
荒大川利涉繁藹惟祐風連雲接

大人有作二后利見九功敷奏七德殷薦鼎寶重
芳勞烈再扇奕世弘道天祿來宴

道弘振古祚未替今如彼在川亦有浮沉大韶旣
素響非我音豈曰荒止塗弗克尋

昌風改物豐水易瀾百川總紀四海合源在彼焉

取聿來莫觀會是褊心敢忘丘園
負暉偏照玄澤謬盈發彼承華頓此增城紀景靈
雲倦遊紫庭匪曰能知寔忝長纓
煥矣金虎襲我皇猷孰云匪忝仰媿蒼流往蹇來
反弭迹一丘變彼東朝言卽爾謀
振振孫子洪族之紀志擬龍潛德配麟趾引服朗
節克明峻軌遵彼中皐於穆不已
於穆不已大都是階之子于命民膺如隕厚德時
邁協風允諧惠此海湄俾也可懷

乃眷丘林樂哉河曲解綬披褐投印懷玉遺情春
臺托蔭寒木言念伊人溫其在谷

道俟人行辭以義輯和容過表余未云執惠音弘
播清風駿集懷德形撫臨篇景立

贈陸士龍

十章

孫拯

字顯世吳郡富春人

能屬文吳黃門郎入晉爲涿令
陸機被誣收極考掠遂死獄中

五龍戢號雲鳥纂紀淳化旣離義風肅始軒冕
垂容文教乃理奕奕英族盛德豐祀
於赫皇吳應天統元蒸文烈公光讚懿勲九命

重輝恭德彌勤華黻襲藻金石載振
淵哉陸生本顯洪胄亦崇懿風邈比弘裕無競
惟德豐光伊茂文以義好施以仁富
山積惟峻道隆名遐潛景在淵龍躍承華旣升
爾儀誰不允嘉有濯重淵載清其波
濟濟皇朝峩峩髦士序爵以賢惟俊萃止翩翩
二官令問不已乃遷華閣皇典斯紀
思文大謨恢我王猷清風肆穆雅憲允休邁彼
江川邈此北流微言蘭馥玉藻雲浮

遭時之儉虎宰滔天憑德羨重繫此俊賢休否
旣亨名以德淵清微伊鑠鑠之彌堅

明明大象玄鑒照微顯允君子求福不回善挹
引慶險以德祈澄濁以靜罔久不暉

釋彼遊寄樂此窈貞形以神和思以道新青雲
方乘芳餌可捐達觀在一萬物自賓

寂寂重門誰和子音瞻彼晨風思託茂林

闕

四言失題

八章

悠悠縣象昭回太素清濁迭興升降啓度遺和旣

言終 卷之七
爽季春告暮朱明來思青陽受煦
日征月盈天道變通太初陶物造化爲功四月惟
夏南征觀方凱風有集飄颻南窓思樂萬物觀異
知同

有滄萋萋甘雨未播黍稷方華中田多稼庭槐振
藻園桃阿那薄言觀物在堂知化

蓬戶惟情玩物一室明發有懷念昔先哲通夢幽
人彷彿遺烈清暉在天孰與永日

乃啓遺籍思予大觀幽居傲物顧景怡顏况惟解
舞衡門重關思媚古人有懷良盤沉曦含輝芳烈
如蘭

厥初生民有物有類自古有稱大寶以位征徒式
好俊奔攸遂啓予有聞誨爾達貴

達貴伊何天爵無榮渾淪大昧混其濁清毀方遯
象遺頑履貞道實藏器景以昭形

芒芒陋世奚兢奚錯牧彼紛華委之冲漠漂志垂
天矯心馮閣通好莊聃儀形有作安得達人顧予
命薄

同前 六章

思樂芳林言采其菊衡薄遵塗中原有菽登彼脩
巒在林寤宿彷彿佳人清顏如玉
予美亡此誰爲適道容與俟之玄髮方皓躑躅山
阿玩此芳草願食其穎庶以遺老
亶亶嘉時飄忽棄予有瞻逝深永歎潛滸登願扶
桑仰結飛晷伊人匪存遺芳孰與
精氣爲物或降或升徂落攸往神奇有登死生爲
徒存亡曷勝謂予不信遺籍有徵

閒居外物靜言樂幽繩樞增結甕牖綢繆和神當
春清節爲秋天地則爾戶庭已悠

嗟我懷人悠悠其潛念昔先烈有懷所欽駭情玩
世堂允南金瓊輝邈矣誰適爲心明發興言忼慨
芳林

同前

美哉良友稟德坤靈明照遠鑿幽微研精超跡皇
英質如瑤瓊贈我翰林示我丹誠道同契合體異
心并自頃西徂合于五樓遲想歡懽觀我良疇亦

言終 卷之十一
既至止願言莫由室邇入鬲中情則憂抱恨東遊
神往形留何以合忍寄之此詩何以寫思記之斯
辭我心愛矣歌以贈之無祕爾音不我是貽

同前

有美一人芳問芬葩嗟我欽羨夢想光華亦既至
止上下欣嘉德馥秋蘭容茂春羅淑似令娣惟予
陋何雖有良友朽木難加愛樂朋規贈以斯歌皆
能載之其美孔多嗟痛薄祜並罹哀苦堂構既崩
過庭莫覩我悴西隣子沉東土契闊艱辛誰與晤
語身滯情往神遊影處發夢宵寐以慰延佇

答兄平原

以下五言○平原贈詩見前

悠悠塗可極別促怨會長街思

善作恩

戀行邁興言

在臨觴南津有絕濟北渚無河梁神往同逝感形
留悲參商衡軌若殊迹牽牛非服箱

答張士然

行邁越長川飄颻冒風塵通波激枉渚悲風薄丘
榛脩路無窮迹井邑自相循百城各異俗千室非
良鄰歡舊難假合風土豈虛親感念桑梓域髣髴

眼中人靡靡日夜遠眷眷懷苦辛

為顧彥先贈婦往返四首

我在三川陽子居五湖陰山海一何曠譬彼飛與
沉目想清慧姿耳存淑媚音獨寐多遠念寤言撫
空衿彼美同懷子非爾誰為心

悠悠君行邁玳瑁妾獨止山河安可踰永路隔萬
里京室多妖冶粲粲都人子雅步擢纖腰巧言發
皓齒佳麗良可羨衰賤焉足紀遠蒙眷顧言銜恩
非望始

翩翩飛蓬征郁郁寒水縈遊止固殊性浮沉豈一
情隆愛結在昔信誓貫三靈秉心金石固豈從時
俗傾羨目逝不顧纖腰徒盈盈何用結中款仰指
北辰星

浮海難為水游林難為觀容色貴及時朝華忌日
晏皎皎彼姝子灼灼懷春粲西城善雅舞總章饒
清彈鳴簧發丹唇朱絃繞素腕輕裾猶電揮雙袂
如霧散華容溢藻幄哀響入雲漢知音世所希非
君誰能讚棄置北辰星問此玄龍煥時暮復何言

詩紀 卷之十 十一
華落理必賤

失題

見藝文
芙蓉部

綠房含青實金條懸白瑇俯仰隨風傾煒燁照清

流闕

同前

見藝文
嘯部

逍遙近南畔長嘯作悲歎

闕

詩紀卷之二十七終

詩紀卷之二十八

晉八

潘岳

字安仁滎陽中牟人美姿儀少以才穎發
名善屬文清綺絕世舉秀才為郎遷河陽

懷二縣令入補尚書郎累遷給事黃門侍郎
素與孫秀有隙及趙王倫輔政秀遂誣岳與
石崇為亂誅之○詩品曰潘岳詩其源出於
仲宣翰林歎其翩翩然如翔禽之有羽毛衣
服之有綃縠猶淺於陸機謝琨云潘詩爛若
舒錦無處不佳陸文似披沙簡金往往見寶
嶸謂益壽輕華故以潘為勝翰林薦論故謂
陸為深余常言陸才如海潘才如江孫興公
曰潘文淺而淨
陸文深而蕪

關中詩

十六章

惠帝元康六年氏賊齊萬年與楊茂於關中反亂既平帝命諸臣作關中詩

岳上表曰詔臣作關中詩輒奉詔竭愚作詩一篇按漢紀孝明時護羌校尉竇

林上降羌顛岸以為羌豪岸兄顛吾復降問事狀林對前後兩屈坐誣罔下獄

死齊萬年編戶隸屬為日久矣而死生異辭必有訛謬故引證喻以懲不恪

於皇時五臣作乃晉受命既固三祖在天聖皇紹祚德

博化光刑簡枉錯微火不戒延我寶庫

蠢爾戎狄狡焉思肆虞我國青窺我利器嶽牧慮

殊威懷理二將無專策兵不素肄

翹翹趙王請徒三萬朝議惟疑未逞斯願栢栢梁

征高牙乃建旗蓋相望偏師作援

虎視眈眈威彼好時素甲日耀玄幕雲起誰其繼

之夏侯卿士惟系惟處別營碁時

夫豈無謀戎士承平守有完郭戰無全兵鋒交卒

奔孰免孟明飛檄秦郊告敗上京

周殉師令身膏氏斧人之云亾貞節克舉盧播違

命投畀朔土為法受惡誰謂荼苦

哀此黎元無罪無辜肝腦塗地白骨交衢夫行妻

寡父出子孤俾我晉民化為狄俘

亂離斯瘼日月其稔天子是矜盱食宴寢主憂臣勞孰不祗慄愧無獻納尸素以甚

皇赫斯怒爰整精銳命彼上谷指日遄逝親奉成規稜威遐厲首陷中亭揚聲萬計

兵固詭道先聲後實聞之有司以萬為一紂之不善我未之必虛晶浦德繆彰甲吉

雍門不啓陳汧危偏觀遂虎奮感恩輸力重圍克解危城載色五臣作邑豈曰無過功亦不測

情固萬端于何不有紛紜齊萬亦孔之醜曰納其降曰梟其首疇真可掩孰偽可久

既徵爾辭既蔽爾訟當乃明實否則證空好爵既五臣作自縻顯戮亦從不見竇林伏尸漢邦

周人之詩寔曰采薇北難獫狁西患昆夷以古况今何足曜威徒愍斯民我心傷悲

斯民如何荼毒于秦師旅既加饑饉是因疫癘淫行荆棘成榛絳陽之粟浮于渭濱

明明天子視民如傷申命羣司保爾封疆靡暴于眾無陵于疆惴惴寡弱如熙春陽

為賈謐作贈陸機 十一章

肇自初創二儀網緼粵有生民伏羲始君結繩闡
化八象成文芒芒九有區域以分

神農更王軒轅承紀畫野離疆爰封衆子夏殷既

襲宗周繼祀綿綿瓜瓞六國互峙

疆秦兼并吞滅四隅子嬰面櫬漢祖膺圖五臣靈

獻微弱在涅則渝三雄鼎足孫啓南吳

南吳伊何僭號稱王大晉統天仁風遐揚偽孫銜

璧奉土歸疆婉婉長離凌江而翔

長離云誰咨爾陸生鶴鳴九臯猶載厥聲況乃海

隅播名上京爰應旌招撫翼宰庭

儲皇之選實簡惟良英英朱鸞來自南岡曜藻崇

正玄冕丹裳如彼蘭蕙載採其芳

藩岳作鎮輔我京室旋反桑梓帝弟作弼或云國

宦五臣清塗攸失吾子洗然恬淡自逸

廊廟惟清俊又是延擢應嘉舉自國而遷齊轡羣

龍光讚納言優游省闈珥筆華軒

昔余與子繼繼東朝雖禮以賓情通友僚嬉娛絲

竹撫鞞舞韶脩日朗月携手逍遙

自我

五臣作成

離群二周于今雖簡其面分著情深子

其超矣實慰我心發言爲詩俟望好音

欲崇其高必重其層立德之柄莫匪安

善作宣

恒在

南稱其度北則橙崇子鋒穎不頽不崩

北芒送別王世胄詩

朱鑣旣揚四轡旣整駕言餞行告離芒嶺情有遷
延日無餘影迴轅南翔心焉北騁

家風詩

縮髮縮髮髮亦髮

一作髮

止日祇日祇敬亦慎止靡

專靡有受之父母鳴鶴匪和析薪弗荷隱憂孔疚

我堂靡構義方旣訓家道穎穎豈敢荒寧一日三

省

於賈謐坐講漢書

治道在儒弘儒由人顯允魯侯文質彬彬筆下摘
藻席上敷珍前疑惟辨舊史惟新惟新爾史旣辨
爾疑延我僚友講此微辭

離合

佃漁始化人民穴處意守醇樸音應律呂桑梓被
 源卉木在野錫鸞未設金石拂舉害咎蠲消吉德
 流普谿谷可安奚作棟宇嫣然以熹焉懼外侮熙
 神委命已求多祐嘆彼季末口出擇語誰能默識
 藝文作誠言喪厥所壟畝之諺龍潛巖阻渺義崇亂少

長失叙

思楊容
姬難堪

金谷集作詩

王生和鼎實石子鎮海沂親友各言邁中心悵有
 違何以叙離思携手游郊畿朝發晉京陽夕次金

谷湄迴谿縈曲阻峻阪路威夷綠池泛淡淡青柳

何依依濫泉龍鱗瀾

一作

激波連珠揮前庭樹沙

棠後園植烏桺靈囿繁石

善作
若

榴茂林列芳梨飲

至臨華沼遷坐登隆坻玄醴染朱顏但愬杯行遲

揚桴撫靈鼓簫管清且悲春榮誰不慕

五臣
作擢

歲寒

良獨希投分寄石友白首同所歸

河陽縣作二首

微身輕蟬翼弱冠忝嘉招在疚妨賢路再升上宰

朝猥荷公叔舉連

五臣
作違

陪廁王寮長嘯歸東山擁

耒耨時苗幽谷茂織葛峻巖敷榮條落英隕林趾
 飛莖秀陵喬卑高亦何常升降在一朝徒恨良時
 泰小人道遂消譬如野田蓬幹流隨風飄昔倦都
 邑游今掌河朔徭登城眷南顧凱風揚微綃洪流
 何浩蕩脩芒鬱岩堯誰謂晉京遠室邇身實遼誰
 謂邑宰輕令名患不劭人生天地間百年孰能要
 頰五臣作歛如槁五臣作敲石火瞥若截道颺齊都無遺聲
 桐鄉有餘謠福謙在純約害盈由矜驕雖無君人
 德視民庶不怵

日夕陰雲起登城望洪河川氣冒山嶺驚湍激巖
 阿歸鴈映蘭時五臣作詩音止游魚動圓波鳴蟬厲寒音
 時菊耀秋華引領望京室南路在伐柯大厦五臣作夏
 緬無覲崇芒鬱嗟峨總總都邑人擾擾俗化訛依
 水類浮萍寄松似懸蘿朱博糾舒慢楚風被琅邪
 曲蓬何以直託身依叢麻黔黎竟何常政成在民
 和位同單父邑愧無子賤歌豈敢陋微官但恐忝
 所荷

在懷縣作二首

言集 卷之八
南陸迎脩景朱明送未垂初伏啓新節隆暑方赫
曦朝想慶雲興夕遲白日移揮汗辭中宇登城臨
清池涼飈自遠集輕襟隨風吹靈圃耀華果通衢
列高椅瓜瓞蔓長苞薑芋紛廣畦稻栽肅芋芋黍
苗何離離虛薄乏時用位微名日卑驅役宰兩邑
政績竟無施自我違京輦四載迄于斯器非廊廟
姿屢出固其宜徒懷越鳥志眷戀想南枝

春秋代遷逝四運紛可喜寵辱易不驚戀本難爲
思我來冰未泮時暑忽隆熾感此還期淹歎彼年
往駛登城望郊甸游日歷朝寺小國寡民務終日
寂無事白水過庭激綠槐夾門植信美非吾土祇
攬懷歸志眷然顧鞏洛山川邈離異願言旋舊鄉
畏此簡書忌祇奉社稷守恪居處職司

內顧詩二首

廣文選作
潘尼者非

靜居懷所歡登城望四澤春草鬱青青桑柘何奕
奕芳林振朱榮淥水激素石初征冰未泮忽焉軫
絺綌漫漫三千里迢迢遠行客馳情戀朱顏寸陰
過盈尺夜愁極清晨朝悲終日夕山川信悠永願

言良弗獲引領訊歸期沈思不可釋

獨悲安所慕人生若朝露綿邈寄絕域眷戀想平
素爾情既來追我心亦還顧形體隔不達精爽交
中路不見山下松隆冬不易故不見澗邊栢歲寒
守一度無謂希見踈在遠分彌固

悼亡詩三首

荏苒冬春謝寒暑忽流易之子歸窮泉重壤永幽
隔私懷誰克從淹留亦何益僂俛恭朝命迴心反
初役望廬思其人入室想所歷幃屏無髣髴翰墨

有餘跡流芳未及歇遺挂猶在壁悵恍如或存周

遑

五臣作惶

忡驚惕如彼翰林鳥雙栖一朝隻如彼游

川魚比目中路析春風緣隙來晨雷承簷滴寢息
何時忘沉憂日盈積庶幾有時衰莊在猶可擊

皎皎窻中月照我室南端清商應秋至溽暑隨節
闌凜凜涼風升始覺夏衾單豈日無重纊誰與同
歲寒歲寒無與同朗月何朧朧展轉眄枕席長簟
竟牀空牀空委清塵室

一作空

作

虛來悲風獨無李氏

靈髣髴覩爾容撫衿長歎息不覺涕霑

五臣作

胸

霑膏安能已悲懷從中起寢興目存形遺音猶在
耳上慙東門吳下愧蒙莊子賦詩欲言志此志難
具紀命也可奈何長戚自令鄙

曜靈運天機四節代遷逝淒淒朝露凝烈烈夕風
厲柰何悼淑儷儀容永潛翳念此如昨日誰知已
卒歲改服從朝政哀心可私制茵幃張故房朔望
臨爾祭爾祭詎幾時朔望忽復盡衾裳一毀撤千
載不復引疊疊朞月周戚戚彌相愍悲懷感物來
泣涕應情隕駕言陟東阜望墳思紆軫徘徊墟墓
間欲去復不忍徘徊不忍去徙倚步踟躕落葉委
埏側枯荻帶墳隅孤魂獨皦皦安知靈與無投心
遵朝命揮涕強就車誰謂帝宮遠路極悲有餘

哀詩

濯如葉落樹邈若雨絕天雨絕有歸雲葉落何處
連山氣冒岡嶺長風鼓松柏堂虛聞鳥聲室暗如
日夕晝愁奄逮昏夜思忽終昔展轉獨悲窮泣下
沾枕席人居天地間飄若遠行客先後詎能幾誰
能弊金石

思子詩

造化甄品物天命代虛盈奈何念稚子懷竒隕幼
齡追想存髣髴感道傷中情一往何時還千載不
復生

別詩

岳集曰堪為成都王軍司馬岳送至北印別作詩

微微髮膚受之父母峨峨王侯中外之首子親伊

姑我父唯舅世說曰阮千里姨兄弟潘安仁中外安仁詩所謂子親伊姑我父唯舅是

許允婿

潘尼

字正叔少與從父岳俱以文章知名舉秀才為太常博士累拜太子舍人出為宛令

人補尚書郎齊王冏起義兵引為參軍事平封安昌公歷中書令永嘉中遷太常卿

七月七日侍皇太子宴玄圃

商風初授辰火微流朱明送夏少昊迎秋嘉禾茂
園芳草被疇於時我后以豫以遊

贈陸機出為吳王郎中令六章

東南之美曩惟延州顯允陸生於今五臣儔振

鱗南海濯翼清流婆娑翰林容與墳丘

玉以瑜潤隨以光融乃漸上京羽善作儀儲宮玩

爾清藻味爾芳風泳之彌廣挹之彌冲

崑山何有有瑤有珉及爾同僚具惟近臣予涉素
秋子登青春愧無老成厠彼日新

祁祁大邦惟桑惟梓穆穆伊人南國之紀帝曰爾
諧惟王卿士俯僂從命奚恤奚喜

我車旣巾我馬旣秣星陳夙駕載脂載轄婉孌二
宮徘徊殿闥醪澄莫饗孰慰饑渴

昔子忝私貽我蕙蘭今子徂東何以贈旃寸晷惟
寶豈無瓊璠彼美陸生可與晤言

答陸士衡

顧茲蓬蔚厠根蘭陂膏澤雖均華不足披逮春不
茂未秋先萎子濯鱗翼我挫羽儀願言難常載合
載離昔遊禁闥祇畏夕惕今放丘園縱心夷易口
詠新詩目玩文跡予志耕圃爾勤王役慙無琬琰
以訓尺璧

答傅咸詩

并序

司徒左長史傅長虞會定九品左長史宜得其
才屈爲此職執天下清議宰割百國而長虞性

直而行或有不堪余與之親作詩以規焉
悠悠群吏非子不整嗷嗷衆議非子不靖忽荷略
組握綱提領矯矯貞臣惟國之屏

皇太子集應令

聖朝命方岳爪牙司北鄰皇儲延篤愛設餞送遠
賓誰應今日宴具惟廊廟臣置酒宜猷庭擊鼓靈
沼濱羽觴飛醽醑芳饌備奇珍巴渝二八奏妙舞
鼓鐸振長袪一作袂生迴颺曲裾揚輕塵

皇太子社

太簇協青陽履端發歲首孟月涉初旬吉日唯上
酉我后邇天休設社祈遐考

三月三日洛水作

晷運無窮已時逝焉可追斗酒足爲歡臨川胡獨
悲暮春春服成百草敷英蕤聊爲三日遊方駕結
龍旂廊廟多豪俊都邑有艷姿朱軒蔭蘭皋翠幙
映洛湄臨崖濯素手步水舉輕衣沈鈎出比目舉
弋落雙飛羽觴乘波進素俎初學作逐隨流歸

贈河陽詩

叔潘岳爲河陽令

處生化單父子竒蒞東阿桐鄉建遺烈武城播絃
歌逸驥騰夷路潛龍躍洪波弱冠步鼎鉉旣立宰
三河流聲馥秋蘭摛藻艷春華徒羨天姿茂豈謂
人爵多

贈侍御史王元貺

崑山積瓊玉廣厦構衆材游鱗萃靈沼撫翼希天
階膏蘭孰爲消濟治由賢能王侯厭崇禮迴迹清
憲臺蠖屈固小往龍翔迺大來協心毗聖世畢力
讚康哉

贈長安令劉正伯詩

遊鸞憑太虛騰鱗託浮霄過蒙嘉時會假翼陵扶
搖疲憊充時乏及余再同僚並跡侍儲宮携手登
皇朝劉侯撫西都邁績參豹喬德厚化必深政明
姦自消萬尋由積篲千里一步超爾其騁逸軌遠
塗固可要

贈隴西太守張正治詩

二八由唐顯周以多士隆羣靈感韶運理翮應翔
風張生拔幽華蘋繁登二宮未幾振朱錦剖符撫

言系 卷之八 十四
西戎及子仍同僚贈言貽爾躬威刑有時用唯德
可令終

贈滎陽太守吳子仲詩

大晉盛得人儲宮畜髦士吳侯降高質剖符授千
里垂覆豈他鄉迴光臨桑梓寮類感岐路黎庶思
知耻老氏喻小鱗曹叅寄獄士無謂敝邑陋覆簣
由茲起

答楊士安詩

逝將辭儲宮栖遲集南畿不悞百里賤徒惜年志
衰躊躇顧城闕怨戀慕端闈俊德貽妙詩敷藻發
清徽媿彼褒崇過感此岐路悲

送盧景宣詩

楊朱焉所哭岐路重別離屈原何傷悲生離情獨
哀知命雖無憂倉卒意低迴歎氣從中發灑淚隨
襟頽九重不常鍵閭闔有時開愧無貯衣獻貽言
取諸懷

迎大駕

南山鬱岑崟洛川迅且急青松蔭脩嶺綠蘩被廣

隰朝日順長塗夕暮無所集歸雲乘幘浮淒風尋
帷入道逢深識士舉手對吾揖世故尚未夷峭函
方嶮澁狐狸夾兩轅豺狼當路立翔鳳嬰籠檻騏
驥見維繫俎豆昔嘗聞軍旅素未習且少停君駕
徐待干戈戢

逸民吟

我顧傲世自遺舒志六合由巢是追沐浴池洪迅
羽衣陟彼名山採此芝薇朝雲靉黷行露未晞遊
魚羣戲翔鳥雙飛逍遙博觀日晏忘歸嗟哉四士
從我者誰

釋奠詩

以下闕文

敦書請業研幾通理尊師重道釋奠崇祀德成教
倫孰云不祉

送大將軍掾盧晏

贈物雖陋薄識意在忘言瓊琚尚交好桃李貴往
還蕭艾苟見納貽我以芳蘭

贈汲郡太守李茂彥

潘尼贈二李郎詩序曰元康六年尚書
郎汝南李光彥遷汲郡太守都亭

侯江夏李茂曾遷平陽太守此二子皆弱冠知名歷職顯要旬月之間繼踵名郡離儉劇之勤就放曠之逸枕鳴琴以俟遠致離別之際各斐然賦詩

離索何惆悵後會未可希河朔貴相忘岐路安足

悲

贈劉佐

要言將誰苦聊以貽友生念我二三賢規我無隱情

詩紀卷之二十八 終

詩紀卷之二十九

晉九

左思

字太冲齊國臨淄人也徵為秘書郎齊王問命為記室辭疾不就以疾終○詩品曰左思詩其源出於公幹文典以怨頗為精切得諷諭之致雖野於陸機而深於潘岳謝康樂常言左太冲詩潘安仁詩古今難比

贈妹九嬪悼離詩

鬱鬱岱清海瀆所經陰精以靈為祥為禎峨峨令妹應期誕生如蘭之秀如芝之榮總角岐嶷齒齟夙成比德古烈異世同聲惟我惟妹寔惟同生早

喪先妣恩百常情女子有行實遠父兄骨肉之恩
固有歸寧何悟離拆隔以天庭自我不見于今二
齡穆穆令妹有德有言才麗漢班明朗楚樊默識
若記下筆成篇行顯中閨名播外藩何以爲贈勉
以列圖何以爲言申以詩書相去在近上下歎歎
含辭滿胸鬱煩不舒

感離詩 一作離思

左貴嬪

自我去膝下倏忽踰再期邈邈浸彌遠拜奉將
何時披省所賜告尋玩悼離詞髣髴想容儀歛

歎不自持何時當奉面娛目於書詩何以訴辛
苦告情於文辭

詠史八首

弱冠弄柔翰卓犖觀群書著論准過秦作賦擬子
虛邊城苦鳴鏑羽檄飛京都雖非甲冑士疇昔覽
穰苴長嘯激清風志若無東吳鈎刀貴一割夢想
騁良圖左眄澄江湘右眄定羗胡功成不受爵長
揖歸田廬

鬱鬱澗底松離離山上苗以彼徑寸莖蔭此百尺

條世胄躡高位英俊沈下僚地勢使之然由來非
一朝金張藉舊業七葉珥漢貂馮公豈不偉白首
不見招

吾希段干木偃息藩魏君吾慕魯仲連談笑却秦
軍當世貴不羈遭難能解紛功成恥善作受賞高
節卓不羣臨組不肯緹對珪寧肯分連璽曜前庭
比之猶浮雲

濟濟京城內赫赫王侯居冠蓋蔭四術朱輪竟長
衢朝集金張館暮宿許史廬南鄰擊鐘磬北里吹

笙竽寂寂楊子宅門無卿相輿寥寥空宇中一作

所講在玄虛言論准宣尼辭賦擬相如悠悠百世
後英名擅八區

皓天舒白日靈景耀神州列宅紫宮裏飛宇若雲
浮峨峨高門內藹藹皆王侯自非攀龍客何為歛
來游被褐出閭闔高步追許由振衣千仞岡濯足
萬里流

荆軻飲燕市酒酣氣益震哀歌和漸離謂若傷無
人雖無壯士節與世亦殊倫高眇邈四海豪右何

足陳貴者雖自貴視之若埃塵賤者雖自賤重之
若干鈞

主父宦不達骨肉還相薄買臣困樵採

善作採樵

伉儷

不安宅陳平無產業歸來翳負郭長卿還成都壁
立何寥廓四賢豈不偉遺烈光篇籍當其未遇時
憂在填溝壑英雄有迍邐由來自古昔何世無奇
才遺之在草澤

習習籠中鳥舉翮觸四隅落落窮巷士抱影守空
廬出門無通路枳棘塞中塗計策棄不收塊若枯
池魚外望無寸祿內顧無斗儲親戚還相蔑朋友
日夜踈蘇秦北游說李斯西上書俛仰生榮華咄
嗟復彫枯飲河期滿腹貴足不願餘巢林棲一枝
可爲達士模

招隱二首

杖策招隱士荒塗橫古今巖穴無結構丘中有鳴

琴白雲

一作雪

停陰岡丹葩曜陽林石泉漱瓊瑤織

鱗或

善作亦

浮沉非必絲與竹山水有清音何事待

嘯歌灌木自悲吟秋菊兼餽糧幽蘭間重襟躊躇

足力煩聊欲投吾簪

經始東山廬果下自成榛前有寒泉井聊可瑩心
神峭舊青葱間竹栢得其真弱葉棲霜雪飛榮流
餘津爵服無常玩好惡有屈伸結綬生纏牽彈冠
去埃塵惠連非吾屈首陽非吾仁相與觀所尚道

遙撰

五臣作極

良辰

雜詩

秋風何冽冽

五臣作烈烈

白露為朝霜柔條旦夕勁綠

葉日夜黃明月出雲崖皦皦流素光披軒臨前庭

嗷嗷晨鴈翔高志局四海塊然守空堂壯齒不恒

居歲慕常慨慷

嬌女詩

吾家有嬌女皎皎頗白皙小字為織

一作純

素口齒

自清歷鬢髮覆廣額雙耳似連璧明朝弄梳臺黛
眉類掃跡濃朱衍丹唇黃吻瀾漫赤嬌語若連瑣
忿速乃明愷握筆利彤管篆刻未期益執書愛綈
素誦習矜所獲其娣玉臺作姊字惠芳兩目燦如畫輕
粧喜樓邊臨鏡忘紡績舉觶擬京兆立的成復易

玩弄眉頰間劇兼機杼役從容好趙舞延袖像飛
 翻上下絃柱際文史輒卷襞顧盼屏風畫如見已
 指擿丹青日塵闇明義為隱曠馳驚翔園林果下
 皆生摘紅葩掇紫蒂萍實驟抵擲貪率風雨中倏
 忽數百適務躡霜雪戲重綦常累積并心注肴饌
 端坐理盤榻翰墨戢閑按相與數離迹動為鑪鉦
 屈屣履任之適止為茶菽攄吹吁對鼎鑪外編脂
 膩漫白袖烟薰染阿錫衣被皆重池重池被之心
 難與沈水碧任其孺子意羞受長者責如池也玉臺

作衣破皆重施誤

瞥聞當與杖掩淚俱向壁

張翰

字季鷹吳郡人有清才縱任不拘時人號為江東步兵齊王問辟為東曹掾

周小史

翩翩周生婉變幼童年十有五如日在東香膚柔
 澤素質參紅團輔圓頤齒齒芙蓉爾形既淑爾服
 亦鮮輕車隨風飛霧流煙轉側猗靡顧盼一作便
 妍和顏善笑美口善言

雜詩二首

暮春和氣應白日照園林青條若總翠黃華如散

金嘉卉亮有觀顧此難久耽延頸無良塗頓足託
幽溪榮與壯俱去賤與老相尋歡樂不照顏慘愴
發謳吟謳吟何嗟及古人可慰心

東鄰有一樹三紀裁可拱無花復無實亭亭雲中
竦隙禽不為巢短翮莫肯任忽有一飛鳥五色雜
英華一鳴衆鳥至再鳴衆鳥羅長鳴搖羽翼百鳥
互相和

思吳江歌

一曰秋風歌

晉文士傳云張翰有清名美望大司馬齊王問辟為東曹掾在洛見秋風起思

吳中菰飯蓴羹鱸魚膾嘆曰人生貴得適意爾何能羈宦數千里以要名爵因作此歌遂命駕還

秋風起兮佳景時吳江水兮鱸魚肥
三千里兮家未歸恨難得兮仰天悲

張載

字孟陽安平人也博學有文章起家佐著作郎累遷弘農大守長沙王又請為記室督拜中書侍郎復領著作稱疾歸卒

登成都白菟樓

重城結曲阿飛宇起層樓

一作區

累棟出雲表嶢嶳

臨太虛高軒啓朱扉迴望暢八隅西瞻岷山嶺嗟

言終
卷之九
峨似荆巫蹲鴟蔽地生原隰殖嘉蔬雖遇堯湯世
民食恒有餘鬱鬱少城中岌岌百族居街術紛綺
錯高甍夾長衢借問楊子宅想見長卿廬程卓累
千金驕侈擬五侯門有連騎客翠帶腰吳鉤鼎食
隨時進百和妙且殊披林採秋橘臨江釣春魚黑
子過龍醢果饌踰蟹螯芳茶冠六清溢味播九區
人生苟安樂茲土聊可娛

贈虞顯度

疇昔協蘭芳繾綣在華年嘉好結平素分著僚友
前謂得終遐日綢繆永周旋吾子遭不造邁閔丁
憂艱俾我失良朋誰與吐話言一日爲三秋歲况
乃三年離居一何闊結思如迴川

招隱詩

出處雖殊塗居然有輕易山林有悔恡人間實多
累鷓雛翔窮冥蒲且不能視鶴鷺遵臯渚數爲矰
所繫隱顯雖在心彼我共一地不見巫山火芝艾
豈相離去來捐時俗超然辭世僞得意在丘中安
事愚與智

七哀詩二首

北芒

五臣作印

何壘壘高陵有四五借問誰家墳皆云

漢世主恭文遙相望原陵鬱廡廡季世

五臣作葉

喪亂

起賊盜如豺虎毀壞過一抔便房啓幽戶珠柙

一作

匣離玉體珍寶見剽虜園寢化為墟周墉無遺堵

蒙龍荆棘生蹊逕登童豎狐兔窟其中蕪穢不復

掃頽隴並墾發萌隸營農圃昔為萬乘君今為丘

中土感彼雍門言悽愴哀今

五臣作往

古

秋風吐商氣蕭瑟掃前林陽鳥

五臣作鳥

收和響寒蟬

無餘音白露中

五臣作朝

夜結木落柯條森朱光馳北

陸浮景忽西沈顧望無所見唯覩松栢陰肅肅高

桐枝翩翩棲孤禽仰聽離鴻鳴俯聞蜻蛚吟哀人

易感傷觸物增悲心丘隴日已遠纏綿彌思深憂

來令髮白誰云愁可任裴徊向長風淚下沾衣襟

霖雨

初學記作張協今從藝文作張載

霖雨餘旬朔濛昧日夜墜何以解愁懷置酒招親

類啾啾絲竹作伶人奏竒秘悲歌結流風逸響迴

秋氣

擬四愁詩四首

我所思兮在南巢欲往從之巫山高登崖遠望涕泗交我之懷矣心傷勞佳人遺我笥中布何以贈之流黃素願因飄風超遠路終然莫致增永慕我所思兮在朔湄欲往從之白雪霏登崖遠望涕泗頽一作垂我之懷矣心傷悲佳人遺我雲中翮何以報之連城璧願因歸鴻超遐翮終然莫致增永積

我所思兮在隴原欲往從之隔太山登崖遠望涕泗漣我之懷矣心傷煩佳人遺我雙角端何以贈之雕玉環願因行雲超重巒終然莫致增永歎我所思兮在營州欲往從之路阻脩登崖遠望涕泗流我之懷矣心傷憂佳人遺我綠綺琴何以贈之雙南金願因流波超重溪終然莫致增永吟

述懷詩

以下闕文

跋跋山川千里告辭楊子哭岐墨氏感絲雲乖雨絕心乎愴而

失題

見初學記奈部

江南郡蔗釀液豐沛三巴黃甘瓜州素奈凡此數
品殊美絕快渴者所思銘之常帶

同前 見藝文
日部

白日隨天迴暎暎圓如規踴躍湯谷中上登扶桑
枝

同前 見藝文
老部

氣力漸衰損鬢髮終以皓昔為春月華今為秋日
草

張協 字景陽與兄載齊名辟公府掾轉秘書郎
累遷中書侍郎轉河間內史時天下已亂

遂屏居草澤以屬詠自娛終於家○詩品曰
張協詩其源出於王粲文體華淨少病累又
巧構形似之言雄於潘岳靡於太冲風流調
達實曠代之高手詞采葱蒨音韻鏗鏘使人
味之疊
疊不倦

詠史

昔在西京時朝野多歡娛藹藹東都門羣公祖二
踈朱軒曜金城供帳臨長衢達人知止足遺榮忽
如無抽簪解朝衣散髮歸海隅行人為隕涕賢哉
此大 選作 夫揮金樂當年歲暮不畱儲顧謂四座
賓多財為累愚清風激萬代名與天壤俱咄此蟬

言終 卷之九
晁客君紳宜見書

雜詩十首

秋夜涼風起清氣蕩暄濁蜻蛉吟階下飛蛾拂明
燭君子從遠役佳人守箠獨離居幾何時鑽燧忽
改木房櫳無行跡庭草萋以綠青苔依空墻蜘蛛
網四屋感物多所懷沈憂結心曲

大火流坤維白日馳西陸浮陽映翠林迴颺扇綠
竹飛雨灑朝蘭輕露棲叢菊龍蟄暄氣凝天高萬
物蕭瑟條不重結芳蕤豈再馥人生瀛海內忽如

鳥過目川上之歎逝前修以自勗

金風扇素節丹霞啓陰期騰雲似涌煙密雨如散

絲寒花發黃采

五臣作彩

秋草含綠滋閒居玩萬物離

羣戀

五臣作念

所思案無蕭氏牘庭無貢公綦高尚遺

王侯道積自成基至人不嬰物餘風足染時

朝霞迎白日丹氣臨暘

善作湯

谷翳翳結繁雲森森

散雨足輕風摧勁草凝霜竦高木密葉日夜踈叢
林森如束疇昔歎時遲晚節悲年促歲暮懷百憂
將從季主卜

昔我資章甫聊以適諸越行行入幽荒歐五臣駱

從祝髮窮年非所用此貨將安設瓴甌夸璵璠魚

目笑明月不見郢中歌能否居然別陽春無和者

巴人皆下節流俗多昏迷此理誰能察

朝登魯陽關狹路峭且溪流澗萬餘丈圍木數千

尋咆虎響窮山鳴鶴聒空林淒風爲我嘯百籟坐

自吟感物多思情在險易常心竭來戒不虞挺轡

越飛岑王陽驅九折周文走岑峯經阻貴勿遲此

理著來今

此鄉非吾地此郭非吾城羈旅無定心翩翩如懸

旌出覩軍馬陣入聞鞞鼓聲常懼羽檄飛神武一

朝征長鋏鳴鞘中烽火列邊亭捨我衡門衣更被

纓胡纓疇昔懷微志惟幕竊所經何必操干戈堂

上有竒兵折衝樽俎間制勝在兩楹巧遲不足稱

拙速乃垂名

述職投邊城羈束戎旅間下車如昨日望舒四五

圓借問此何時胡蝶飛南園流波戀舊浦行雲思

故山閩越衣文虵胡馬願度燕風土安所習由來

有固然

結宇窮岡曲耦耕幽藪陰荒庭寂以閒幽一作岫

峭且深淒風起東谷有滄興南岑雖無箕畢期膚

寸自成霖澤雉登壘確寒猿擁條吟溪壑無人跡

荒楚鬱蕭森投耒循岸垂時聞樵採音重基可擬

志迴淵可比心養真尚無為道勝貴陸沈游思竹

素園寄辭翰墨林

墨蜈躍重淵商羊儻野庭飛廉應南箕豐隆迎號

屏雲根臨八極雨足灑四溟霖瀝過二旬散漫亞

九齡階下伏泉涌堂上水衣生洪潦浩方割人懷

昏墊情沈液漱陳根綠葉腐秋莖里無曲突煙路

無行輪聲環堵自頽毀垣間不隱形尺燼重尋桂

紅粒貴瑤瓊君子守固窮在約不爽貞雖榮田方

贈慙為溝壑名取志於陵子比足五臣作之黔婁生

襍詩

太昊啓東節春郊禮青祗鷹化日夜分雷動寒暑

離飛澤洗冬條浮颺解春漸采虹纓高雲文虬鳴

陰池冲氣扇九垓蒼生衍四垂時至萬寶成化周

天地移

遊仙

崢嶸玄圃深嵯峨天嶺峭亭館籠雲構修梁流三
曜蘭葩蓋嶺披清風緣隙嘯

闕

詩紀卷之二十九

終

詩紀卷之三十

晉十

夏侯湛

字孝若譙國人幼有盛才文章宏富善
構新詞泰始中舉賢良拜郎中後轉尚
書郎出為野王令惠帝即
位為散騎常侍元康初卒

周詩

敘曰周詩者南垓白華華黍由庚崇丘由儀六
篇有其義而亡其辭湛續其亡故云周詩也

世說

曰夏侯湛作周詩成示潘安仁安仁曰此非徒
溫雅乃別見孝悌之性潘因此遂作家風詩

既殷斯虔仰說洪恩夕定晨省奉朝侍昏宵中告

詩紀

卷之十 晉

言終
卷之十
退鷄鳴在門孳孳恭誨夙夜是敦

山路吟

夙駕兮待明陟山路兮遐征冒晨朝兮入大谷道
逶迤兮嵐氣清攬轡兮抑馬踟躕兮曠野曠野疆
兮遼落崇岳兮嵬嶸丘陵兮連離卉木兮交錯淥
水兮長流驚濤兮拂石

江上泛歌

悠悠兮遠征倏倏兮暨南荆南荆兮臨長江臨長
江兮討不庭江水兮浩浩長流兮萬里洪浪兮雲
轉陽侯兮奔起驚翼兮垂天鯨魚兮岳峙蘼蕪紛
兮被臯陸修竹鬱兮翳崖趾望江之南兮遨目桂
林桂枝蒼鬱兮鷓鴣揚音凌波兮願濟舟楫不具
兮江水深沈嗟廻盼於北夏何歸軫之難尋

離親詠

剖符兮南荆辭親兮遐征發軔兮皇京夕臻兮泉
亭撫首兮內顧按轡兮安步仰戀兮後塗俯歎兮
前路旣感物以永思兮且歸身乎懷抱苟違親以
從利兮匪曾閔之攸寶視微榮之瑣瑣兮知吾志

詩經 卷之十
之愈小獨申愧於一心兮慙報德之彌少

長夜謠

日暮兮初晴天灼灼兮遐清披雲兮歸山垂景兮
照庭列宿兮皎皎星稀兮月明亭檐隅以逍遙兮
盼太虛以仰觀望閭闔之昭晰兮麗紫微之暉煥

寒苦謠

惟立冬之初夜天慘慄以降寒霜皚皚以被庭冰
澹瀨於井幹草槭槭以䟽葉木蕭蕭以零殘松隕
葉於翠條竹摧柯於綠竿

王讚

字正長義陽人也博學有俊才辟司空掾歷散騎侍郎卒

三月三日詩

招搖啓運寒暑代新疊疊不舍如彼行雲猗猗季
月穆穆和春皇儲降止宴及嘉賓嘉賓伊何具惟
姻族如彼葛藟衍于樛木郁郁近侍巖巖台嶽庶
寮鱗次以崇天祿如彼崑山列此琚玉巍巍天階
亦降列宿右載元首左光儲副大祚無窮天地爲
壽

侍皇太子宴始平生

言終 卷之十
三
亶亶聖胤繼明重體樂此棠棣其甘如薺我有嘉
宴以洽百禮煌煌同族藹藹王僚惟中惟外如瓊
如瑤湛湛朝雲德靡不覆玄黃所綴文成綵繡政
以神和樂以安奏一人有慶萬邦是祐

侍皇太子祖道楚淮南二王

於明聖晉仰統天緒易以明險簡以識藝文阻研
彼羣慮俾侯授土郁郁二王祇承皇命睹離鑒親
觀禮知盛皇儲降會延于公姓瞻彼行役並憇同
林分塗殊軌靡不迴心

雜詩

朔風動秋草邊馬有歸心胡寧久分析靡靡忽至
今王事離我志殊隔過商參昔往鷓鷯鳴今來蟋
蟀吟人情懷舊鄉客鳥思故林師涓久不奏誰能
宣我心

孫楚

字子荆太原中都人少負才氣多陵傲初
為石苞驃騎參軍初至長揖曰天子命我
參卿軍事因此構隙湮廢積年後扶風王駿
起為征西參軍遷衛軍司馬惠帝初拜馮翊
太守

答弘農故吏民

昔我先侯邁德垂化康哉之詠寔由良佐惟余忝
 辱弗克負荷每歷貴邦仰瞻泰華追慕先軌感想
 哀嗟詵詵臣故爰及羣士皓首老成率彼邑里闡
 崇高義長幼以齒

除婦服詩

集云婦胡母氏也世說曰孫子荆除婦服作詩以示王武子王曰未知文生於情情生於文覽之悽然增伉儷之重

時邁不停日月電流神爽登遐忽已一周禮制有
 敘告除靈丘臨祠感痛中心若抽

征西官屬送於陟陽侯作詩

晨風飄岐路零雨被秋草傾城遠追送餞我千里
 道三命皆有極咄嗟安可保莫大於殤子彭聃猶
 為夭吉凶如糾纏憂喜相紛繞五臣作擾天地為我鑪
 萬物一何小達人垂大觀誠此苦不早乖離即長
 衢惆悵盈懷抱孰能察其心鑒之以蒼昊齊契在
 今朝守之與偕老

太僕座上詩

以下闕文

朝欽厥庸出尹京畿廻授太僕四牡駢駢綠耳盈

詩經 卷之十
箱翠華歲蕤勲齊庭實增國之輝

祖道詩

仰天惟龍御地以驥利有攸往不期而至

之馮翊祖道詩

舉翮撫三秦抗我千里目念當隔山河執觴懷慘

毒

董京

字威輦不知何郡人初與隴西計吏俱至洛陽被髮而行逍遙吟詠常宿白社中時

乞於市後數年遁去莫知所之

詩二首

晉書曰京既遁去於其寢處有詩二篇

乾道剛簡坤體敦密茫茫太素是則是述末世流

奔以文代質悠悠世目孰知其實逝將去此至虛

歸我自然之室

孔子不遇時彼感麟

舊作麟誤

麟乎麟胡不遁世以存

真

答孫楚詩

晉書隱逸傳曰京在洛陽孫楚時為著作郎數就社中與京語遂載與俱歸京不肯坐楚貽之書曰今堯舜之世胡為懷道迷邦京答之以詩

周道敷兮頌聲沒夏政衰兮五常汨便便君子顧
望而逝洋洋乎滿目作者七豈不樂天地之化也
哀乎哉時之不可與對之以獨處無娛我以為歡
清流可飲至道可餐何為栖栖自使疲單魚懸獸
檻鄙夫知之古之至人藏器如霧縕袍不能令暖
當作今暖軒冕不能令榮動如川之流靜如川之停鸚
鵡能言泗濱浮磬衆人所翫豈合物情玄鳥紆幕
而不被害鳴隼遠巢咸以欲死盼被梁魚逡巡倒
尾沈吟不決忽焉失水嗟乎魚鳥相與萬世而不

悟以我觀之乃明其故焉知不有達人深穆其度
亦將闕我輦願而去萬物皆賤惟人為貴動以九
州為狹靜以園堵為大

石崇

字季倫渤海人年二十餘為城陽太守伐吳有功封安陽鄉侯累遷侍中出為南中

郎將荆州刺史領南蠻校尉致富不貲後拜太僕衛尉有愛妓綠珠孫秀使人求之不得遂勸趙王倫誅族其家

大雅吟

堂堂太祖淵弘其量仁格宇宙義風遐暢啓土萬
里志在翼亮三分有二周文是尚於穆武王奕世

載聰欽明冲默文思允恭武則不猛化則時雍庭
有儀鳳郊有遊龍啓路千里萬國率從蕩清吳會
六合乃同百姓仰德良史書功超越三代唐虞比
蹤

楚妃歎

蕩蕩大楚跨土萬里北據方城南接交趾西撫巴
漢東被海涖五侯九伯是疆是理矯矯莊王淵渟
岳峙冕旒垂精克纘塞耳韜光戢曜潛默恭已內
委樊姬外任孫子猗猗樊姬體道履信旣紬虞丘
九女是進杜絕邪佞廣啓令胤割歡抑寵居之不
吝不吝實難可謂知幾化自近始著於閨闈光佐
霸業邁德揚威羣后列辟式瞻洪規譬彼江海百
川咸歸萬邦作歌身沒名飛

王明君辭

并序

王明君者本是王昭君呂觸文帝諱改之匈奴
盛請婚於漢元帝呂後宮良家子昭君配焉昔
公主嫁烏孫令琵琶馬上作樂以慰其道路之
思其送昭君亦必爾也其造新曲多哀怨之聲

言終
卷之十
故敘之於紙云爾

我本漢家子將適單于庭辭訣未及終前驅已抗
旌僕御涕流離轅馬悲且鳴哀鬱傷五內泣淚沾
朱纓行行日已遠遂造匈奴城延我於穹廬加我
闕氏名殊類非所安雖貴非所榮父子見陵辱對
之慙且驚殺身良不易默默以苟生苟生亦何聊
積思常憤盈願假飛鴻翼乘之以遐征飛鴻不我
顧佇立以屏營昔爲匣中玉今爲糞上英朝華不
足歡甘與秋草并傳語後世人遠嫁難爲情

思歸引 并序

余少有大志夸邁流俗弱冠登朝歷位二十五
年五十以事去官晚節更樂放逸篤好林藪遂
肥遁於河陽別業其制宅也却阻長隄前臨清
渠栢木幾於萬株江水周於舍下有觀閣池沼
多養魚鳥家素習技頗有秦趙之聲出則以遊
目弋釣爲事入則有琴書之娛又好服食咽氣
志在不朽傲然有凌雲之操歛復見牽羈婆娑
於九列困於人間煩黷常思歸而永歎尋覽樂

言終
卷之十
九
篇有思歸引儻古人之心有同於今故制此曲
此曲有弦無歌今爲作歌辭以述余懷恨時無
知音者令造新聲而播於絲竹也

思歸引歸河陽假余翼鴻鶴高飛翔經芒阜濟河
梁整我舊館心悅康清渠激魚徬徨鴈驚沂波羣
相將終日周覽樂無方登雲閣列姬姜拊絲竹叩
宮商宴華池酌玉觴

思歸歎

登城隅兮臨長江極望無涯兮思填胸魚澆潏兮

鳥繽翻澤雉遊鳧兮戲中園秋風厲兮鴻鴈征蟋
蟀嘈嘈兮晨夜鳴落葉飄兮枯枝竦百草零落兮
覆畦壟時光逝兮年易盡感彼歲暮兮悵自愍廓
羈旅兮滯野都願御北風兮忽歸徂惟金石兮幽
且清林鬱茂兮芳卉一作草盈玄泉流兮滎丘阜閣
館蕭寥兮蔭叢柳吹長笛兮彈五絃一本作玉琴高歌
凌雲兮樂餘年舒篇卷兮與聖談釋冕投綬兮希
彭聃超逍遙兮絕塵埃福亦不至今禍亦不來

答曹嘉詩

見魏志註

昔常接羽儀俱遊青雲中敦道訓胄子儒化渙以融同聲無異響故使恩愛隆豈惟敦初好款分在令終孔不陋九夷老氏適西戎逍遙滄海隅可以保王躬世事非所務周公不足夢玄寂令神王是以守至冲

贈棗腆

久官無成績棲遲於徐方寂寂守空城悠悠思故鄉恂恂二三賢身遠屈龍光攜手沂泗間遂登舞雩堂文藻譬春華談話猶蘭芳消憂以觴醴娛耳

以名娼博奕逞妙思弓矢威邊疆

答棗腆

載藝文類聚

言念將別睹物傷情贈爾話言要在遺名惟此遺名可以長生

曹嘉

魏楚王彪世子封常山真定王入晉封高邑公元康中為國子博士後為東莞太守

贈石崇詩

曹嘉元康中與石崇俱為國子博士後嘉為東莞太守崇為征虜將軍監青徐軍事屯於下邳嘉以詩遺崇

文武應時用兼才在明哲嗟嗟我石生為國之俊

言終 卷之十
傑入侍於皇闈

一作闈

出則登九列威檢肅青徐風

發宣吳喬疇昔謬同位情至過魯衛分離踰十載

思遠心增結

音髻

願子鑒斯誠寒暑不踰契

曹攄

字顯遠譙國人也篤志好學參南國中郎將遷高密王左司馬流人王適等侵掠城

邑遇戰軍敗死之

思友人詩

密雲翳陽景霖潦淹

五臣作浩

庭除嚴霜彫翠草寒風

振纖枯凜凜天氣清落落卉木踈感時歌蟋蟀思

賢詠白駒情隨玄陰滯心與迴颯俱思心何所懷

懷我歐陽子精義測神奧清機發妙理自我別旬

朔微言絕于耳褰裳不足難清揚未可俟延首出

階檐佇立增想似

感舊詩

富貴他人合貧賤親戚離廉藺門易軌田竇相奪

移晨風集茂林棲鳥去枯枝今我唯困蒙羣士所

一作皆

背馳鄉人敦懿義濟濟陰光儀對賓頌有客

舉觴詠露斯臨樂何所歎素絲與路岐

贈石崇

涓涓谷中泉鬱鬱巖下林泄泄羣翟飛咬咬春鳥
 吟野次何索寞薄暮愁人心三軍望衡蓋歎息有
 餘音臨肴忘肉味對酒不能斟人言重別離斯情
 效於今

棗腆

字玄方以文章顯永
嘉中為襄城太守

答石崇詩

昔我不造備嘗顛沛后土傾基皇天隕蓋少懷蒙
 昧長無耿介遺訓莫聞出入靡賴我舅敷命于彼
 徐方載詠陟岡言念渭陽乃泝洪流汎身餘艱宵

寢晨逝曷路之長亦既至止願言以寫爰有石侯
 作鎮東夏寬以撫戎從容柔雅我聞有言居安思
 危位極則遷勢至必移上德無欲貴道不為妙識
 先覺通夢皇羲竊覩堂奧欽蹈明規

贈石季倫

深蒙君子眷雅顧出羣俗受寶取諸懷所贈非珠
 玉凡我二三子執手携玉腕嘉言從所好企予結
 雲漢望風整輕翮因虛舉雙翰朝遊清渠側日夕

登高館

初學記載四句曰翕如翔雲會忽若驚風
散分給懷離析對樂增累歎題云贈石崇

歐陽建

字堅石渤海人石崇甥為馮翊太守趙王倫之為征西撓亂關中建每匡正不

從私欲迎楚王偉立之由是有隙石崇勸淮南王誅倫未行事覺倫收崇建及母妻無少

害長見

答棗腆詩

此詩文義是贈石季倫藝文云答棗腆詩或誤也

於鑠我舅明德塞違俾扞東藩在徐之邳載播其
惠載揚其威濟寬以猛方夏以綏光啓先業增耀
重暉咨余冲人艱苦攸離過庭無聞頑固匪移寔
賴茲誨導之軌儀仰遵嘉訓俯蹈明規如葛斯蔓
如穆斯垂我邁君子仰之彌高巖巖其高卽之惟
温居盈思冲在貴忘尊縱酒嘉讌自明及昏無幽
不研靡輿不論人樂其量士感其敦

臨終詩

伯陽適西戎孔子欲居蠻苟懷四方志所在可遊
盤况乃遭屯蹇顛沛遇災患古人達機兆策馬遊
近關咨余冲且暗抱責守微官潛圖密已構成此
禍福端恢恢六合間四海一何寬天網布絃綱投
足不獲安松栢隆冬悴五臣作瘁然後知歲寒不涉太
行險誰知斯路難真偽因事顯人情難豫觀窮達

有定分慷慨復何歎上負慈母恩痛酷摧心肝下

顧所五臣作嬌憐女惻惻心中酸二子棄若遺念皆邁

凶殘不惜一身死惟此如循環執紙五情塞揮筆

涕洟瀾

嵇紹 字延祖譙國鈺人康之子十歲而孤事母孝謹累遷散騎常侍惠帝敗於蕩陰百官

左右皆奔散唯紹儼然端冕以身衛帝兵交御輦飛箭雨集遂以見害

贈石季倫

人生稟五常中和為至德嗜欲雖不同伐生所不

識仁者安其身不為外物惑事故誠多端未若酒

之賊內以損性命煩辭傷軀則屢飲致疲怠清和

自否塞陽堅敗楚軍長夜傾宗國詩書著明戒量

體節飲食遠希彭聃壽虛心處冲默茹芝味醴泉

何為昏酒色

嵇含 字君道紹從子也好學能屬文家鞏縣亳丘自號亳丘子舉秀才除郎中惠帝朝為

中書侍郎累官至平越中郎將廣州刺史

悅晴

勁風歸巽林玄雲起重基朝霞炙瓊樹夕景映玉

枝 初學作雲芝 翔鳳晞輕翮應龍曝織髻百穀偃而立

大木顛復持

伉儷

余執百兩轡之子詠采繁我憐聖善色爾悅慈姑

顏裁彼雙絲綃著以同功綿夏搖比翼扇冬臥藝文

作坐蛩蛩饑食並根粒渴飲一流泉朝蒸同心

暮庖比目鮮挹用合卺醕受以連理盤朝采同本

芝夕掇駢穗蘭臨軒樹萱草中庭植合歡

阮修字宣子陳留尉氏人好易老善清言瑯邪王處仲引為鴻臚丞太子洗馬避亂南行

為賊所害

上巳會詩

三春之季歲惟嘉時靈雨既零歲時作零雨既濛風以散

之英華扇耀祥鳥羣嬉澄澄綠水澹澹其波脩岸

逶迤長川相過聊且逍遙其樂如何坐此脩筵臨

彼素流嘉肴既設舉爵獻酬彈箏弄琴新聲上浮

水有七德知者所娛清瀨澆澗菱葭芬敷沈此芳

鈎引彼潛魚委餌芳美君子戒諸

閻丘冲字賓卿高平人清平有鑿識博學有文義累遷太傅長史光祿勳京邑未潰乘

車出為賊所害時人皆痛惜之

詩經 卷之十
三月三日應詔詩二首

暮春之月春服既成陽昇土潤冰渙川盈餘萌達
壤嘉木敷榮后皇宣遊既宴且寧光光華輦詵詵
從臣微風扇穢朝露翳塵上蔭丹幄下藉文茵臨
川初學挹盥濯故潔新俯鏡清流仰睇天津藹藹
華林巖巖景陽業業峻宇奕奕飛梁垂蔭倒景若
沈若翔

浩浩白水汎汎龍舟皇在靈沼百辟同遊擊擢清
歌鼓柷行酬初學聞樂咸和具醉斯柔在昔帝虞

德被遐荒干戚在庭苗民初學來王今我哲后古

聖齊芳惠此中國以綏四方元首既明股肱惟良

樂酒今日君子惟康初學云樂只君子今日惟康

招隱詩

大道曠且夷蹊路安足尋經世有險易隱顯自存
心嗟哉巖岫士歸來從所欽

周處字子隱義興陽羨人也仕吳為東觀左丞入洛遷新平廣漢二郡太守尋除楚內史

徵拜御史中丞凡所糾劾不避寵戚及氏人齊萬年反朝臣惡其疆使隸夏侯駿西征軍敗死之

詩一首

晉書曰齊萬年屯梁山有眾七萬夏侯
駿逼處以五千兵擊之乃攻萬年於六
陌處軍未食梁王彤促令速戰而
絕其後繼處知必敗賦詩云云

去去世事已策馬觀西戎藜藿甘梁黍期之克令

終時潘岳奉詔作關中詩曰周殉師令身膏氏斧
人之云亾貞節克舉又西戎校尉閻續亦上詩

云周全其節令問不已
身雖云沒書名良史

郭泰機以下爵
里無考

答傅咸

繳白素絲織為寒女衣寒女雖妙巧不得秉杼

機天寒知運速况復鴈南飛衣工秉刀尺棄我忽

若遣人不取諸身世事焉所希况復已朝餐曷由

知我饑

辛曠

贈皇甫謐

顛顛朝士亦孔其依莫不遲想載渴載饑我弓我

旌禮亦無違企望高岡來儀來歸其歸伊何與帝

同心明明天子如日之臨臨照四方探願幽深山

無逸民水無潛鱗爰被一作九臯克量德音茂哉

先生皇實是欽

左貴妃

名芬思之妹少好學善綴文武帝聞而納之泰始八年拜修儀後為貴妃姿陋

無寵以才德見禮每有方物異寶必詔為賦頌以是屢獲恩賜焉

啄木詩

藝文類聚曰宋袁淑俳諧集左氏詩形管集作左九嬪

南山有鳥自名啄木饑則啄樹暮則巢宿無干於人唯志所欲性清者榮性濁者辱

感離詩

一作離思此答左思贈妹之作

我去膝下倏忽踰再期邈邈浸彌遠拜奉將何言所賜告尋玩悼離詞髣髴想容儀欷歔不

自持何時當奉面娛目於書詩何以訴辛苦告情於文辭

綠珠

石崇妾

懊儂歌

古今樂錄曰懊儂歌晉綠珠所作唯絲布澁難縫一曲而已

津
絲布澁難縫令儂十指穿黃牛細犢車遊戲出孟

翔風

怨詩

王子年拾遺記曰石季倫有愛婢曰翔風魏末於胡中得之年十五無有比其容貌最以文辭擅愛年三十妙年者爭嫉之崇退翔風為房老使主羣少乃懷怨而作詩

春華誰不美卒傷秋落時突烟還自低鄙退豈所期桂芳徒自蠹失愛在蛾眉坐見芳時歇憔悴空自嗤

詩紀卷之三十一終

詩紀卷之三十一

晉十一

劉琨

字越石中山人少以雄豪著名永嘉初為并州刺史建興二年加大將軍都督并州三年進司空四年其長史以并州叛降石勒琨遂奔薊段匹磾因與結婚約以共戴晉室元帝渡江復加太尉封廣武侯後其子羣與匹磾有隙遂被害謚曰愍○詩品曰太尉劉琨中郎盧諶詩其源出於王粲善為悽戾之詞自有清拔之氣琨既體良才又罹厄運故善叙來亂多感恨之詞中郎仰之微不逮矣

答盧諶 八章

琨頓首損書及詩備辛酸之苦言暢經通之遠

言系
旨執玩反覆不能釋手慨然以悲歡然以喜昔
在少壯未嘗檢括遠慕老莊之齊物近嘉阮生
之放曠怪厚薄何從而生哀樂何由而至自頃
輒張困於逆亂國破家亡親友彫殘塊然獨坐
則哀憤兩集負杖行吟則百憂俱至時復相與
舉觴對膝破涕爲笑排終身之積慘求數刻之
暫歡譬由疾疢彌年而欲一丸銷之其可得乎
夫才生於世世實須才和氏之璧焉得獨曜於
郢握夜光之珠何得專玩於隨掌天下之寶固

當與天下共之但分析之日不能不悵恨爾然
後知聃周之爲虛誕嗣宗之爲妄作也昔騷驥
倚輶於吳阪鳴於良樂知與不知也百里奚愚
於虞而智於秦遇與不遇也今君遇之矣勗之
而已不復屬意於文二十餘年矣久廢則無次
想必欲其一反故稱指送一篇適足以彰來詩
之益美耳琨頓首頓首

厄運初邁陽爻在六乾象棟傾坤儀舟覆橫厲糾
紛羣妖競逐火燎神州洪流華域彼黍離離彼稷

言系 卷之十一
育育哀我皇晉痛心在目
天地無心萬物同塗禍淫莫驗福善則虛逆有全
邑義無完都英藥夏落毒卉冬敷如彼龜玉韞櫝
毀諸芻狗之談其最得乎

咨余軟弱弗克負荷愆釁仍彰榮寵屢加威之不
建禍延凶播忠隕于國孝愆于家斯罪之積如彼
山河斯釁之深終莫能磨

郁穆舊姻燕婉新婚不慮其敗唯義是敦裹糧携
弱匍匐星奔未輟爾駕已隳五臣作墮我門二族偕覆

三孽竝根長慙舊孤永負冤寃

亭亭孤幹獨生無伴綠葉繁縟柔條脩罕朝採爾
實夕捋爾竿竿翠豐尋逸珠盈椀實消我憂憂急
用緩逝將去矣庭虛情滿

虛滿伊何蘭桂移植茂彼春林瘁此秋棘有鳥翻
飛不遑休息匪桐不棲匪竹不食永戢東羽翰撫
西翼我之敬之廢歡輟職

音以賞奏味以殊珍文以明言言以暢神之子之
往四美不臻澄醪覆觴絲竹生塵素卷莫啟幄無

談賓既孤我德又闕我鄰

光光段生出幽遷喬資忠履信武烈文昭旌弓駢

駢輿馬翹翹乃奮長縻是轡是鑣何以贈子竭心

公朝何以敘懷引領長謠

重贈盧諶

握中有玄璧本自荆山璆惟彼太公望昔在渭濱

叟鄧生何感激千里來相求白登幸曲逆音句鴻

門賴留侯重耳任五賢小白相射鉤苟能隆二伯

安問黨與讐中夜撫枕歎相與數子游吾衰久矣

夫何其不夢周誰云聖達節知命故不憂宣尼悲

獲麟西狩涕孔丘功業未及見夕陽忽西流時哉

不我與去乎若雲浮朱實隕勁風繁英落素秋狹

路傾華一作車蓋駭駟摧雙輶何意百鍊剛化為繞

指柔晉書曰琨詩託意非常摠暢幽憤遠想張陳

常詞訓和

扶風歌

朝發廣莫門暮宿丹水山左手彎繁弱右手揮龍

淵顧瞻望宮闕俯仰御飛軒據鞍長歎息淚下如

流泉繫馬長松下發鞍高岳頭烈烈悲風起泠泠

澗水流揮手長相謝哽咽不能言浮雲為我結歸

五臣作飛鳥為我旋去家日已遠安知存與亾慷慨窮

林中抱膝獨摧藏麋鹿游我前猿猴戲我側資糧

既乏盡薇蕨安可食攬轡命徒侶吟嘯絕巖中君

子道微矣夫子故一作固有窮惟昔李騫期寄在匈

奴庭忠信反獲罪漢武不見明我欲竟此曲此曲

悲且長棄置勿重陳重陳令心傷樂府每四句一解凡九解

胡姬年十五

漢辛延年羽林郎胡姬年十五春日

獨當壚○樂府作晉劉琨五言律祖作

梁劉琨然晉未有律

體律祖或有考也

虹梁照曉日淥水泛香蓮如何十五少含笑酒壚

前花將面自許人共影相憐回頭堪百萬價重為

時年

盧諶

字子諒范陽人好老莊善屬文選尚武帝

女榮陽公主後為劉琨主簿轉從事中郎

琨為段匹磾所害諶投段末波後為石季龍

所得官至中書監屬丹閣誅石氏因遇害

贈劉琨

二十章

書曰故吏從事中郎盧諶死罪死罪諶稟性短

弱當世罕任因其自然用安靜退在木闕不材
之資處鴈乏善鳴之分卷異遽子愚殊甯生匠
者時眇不免饌賓嘗自思惟因緣運會得蒙接
事自奉清塵於今五稔謨明之效不著候人之
譏已彰大雅含弘量包山藪加以待接彌優款
眷逾昵與運籌之謀厠讌私之歡綢繆之旨有
同骨肉其爲知己古人罔喻昔聶政殉嚴遂之
顧荆軻慕燕丹之義意氣之間糜軀不悔雖微
達節謂之可庶然苟曰有情孰能不懷故委身

之日夷險以之事與願違當忝外役遂去左右
收迹府朝蓋本同末異楊朱與哀始素終玄墨
翟垂涕分乖之際咸可歎慨致感之途或迫於
茲亦奚必臨路而後長號覩絲而後戲歛哉是
以仰惟先情俯覽今遇感存念亾觸物增眷易
曰書不盡言言不盡意然則書非盡言之器言
非盡意之具矣况言有不得至於盡意書有不
得至於盡言邪不勝猥瀆謹貢詩一篇抑不足
以揄揚弘美亦以攄其所抱而已若公肆大惠

言紀 卷之十一
遂其厚恩錫以咳唾之音慰其違離之意則所謂咸池酬於北里夜光報於魚目諶之願也非所敢望也諶死罪死罪

濬哲惟皇紹熙有晉振厥弛維光闡遠韻有來斯雍至止伊順三台擄朗四嶽增峻

伊陟佐商山甫翼周弘濟艱難對揚王休苟非異德曠世同流加其忠貞宣其徽猷

伊諶陋宗昔邁嘉惠申以婚姻著以累世義等休戚好同興廢孰云匪諧如樂之契

王室喪師私門播遷望公歸之視險忽艱茲願不遂中路阻顛仰悲先意俯思身愆

大鈞載運良辰遂往瞻彼日月迅過俯仰感今惟昔口存心想借日如昨忽爲疇曩

疇曩伊何逝者彌踈温温恭人慎終如初覽彼遺音恤此窮孤譬彼樛木蔓葛以敷

妙哉蔓葛得託樛木葉不雲布華不星燭承侔卞和質非荆璞眷同尤良尤郵同用乏驥騄

承亦旣篤眷亦旣親飾獎駑猥方駕駿珍弼諧靡

成良謨莫陳無覬狐趙有與五臣

五臣奚與契濶百罹

五臣作羅

身經險阻足蹈幽遐義

由恩深分隨昵加綢繆委心自同匪他

昔在暇日妙尋通理尤彼意氣狹是節士情以體

生感以情起趣舍同

李善作罔

要窮達斯已

由余片言秦人是憚日碑效忠飛聲有漢桓桓撫

軍古賢作冠來牧幽都濟厥塗炭

塗炭旣濟寇挫民阜謬其疲隸授之朝右上懼任

大下欣施厚實祇高明敢忘所守

相彼反哺尚在翔禽孰是人斯而忍斯心每憑山

海庶覲高深遐眺存亾緬成飛沈

長徽已纓逝將徙

文選作徒

舉收跡西踐銜哀東顧曷

云塗遼曾不咫尺步豈不夙夜謂行多露

綿綿女蘿施於松標稟澤洪幹晞陽豐條根淺難

固莖弱易彫操彼纖質承此衝颺

纖質寔微衝颺斯值誰謂言精緻在賞意不見得

魚亦忘厥餌遺其形骸寄之深識

先民願意潛山隱几仰熙丹崖俯澡綠水無求於

和自附衆美慷慨遐蹤有愧高旨

爰造異論肝膽楚越惟同大觀萬塗一轍死生旣
齊榮辱奚別處其玄根廓焉靡結

福爲禍始禍作福階天地盈虛寒暑周迴夫差不
祀釁在勝齊勾踐作伯祚自會稽

邈矣達度唯道是杖形有未泰神無不暢如川之
流如淵之量上弘棟隆下塞民望

贈崔溫

集曰與溫大
真崔道儒

逍遙步城隅暇日聊游豫北眺沙漠垂南望舊京

路平陸引長流岡巒挺茂樹中原厲迅飈山阿起
雲霧遊子恒悲懷舉目增永慕良儔不獲偕舒情
將焉訴遠念賢士風遂存往古務朔鄙多俠氣豈
唯地所固李牧鎮邊城荒夷懷南懼趙奢正疆場
秦人折北慮羈旅及寬政委質與時遇恨以鴛蹇
姿徒煩非子御亦旣弛負擔忝位宰黔庶苟云免
罪戾何暇收民譽倪寬以殿黜終乃最衆賦何武
不赫赫遺愛常在去古人非所希短弱自有素何
以敷斯辭惟以二子故

答魏子悌

崇臺非一榦珍裘非一腋多士成大業羣賢濟弘
績遇蒙時來會聊齊朝彥跡顧此腹背羽愧彼排
虛翮寄身蔭四嶽託好憑三益傾蓋雖終朝大分
邁疇昔在危每同險處安不異易俱涉晉昌艱共
更飛狐厄恩由契濶生義隨周旋積豈謂鄉曲譽
謬充本州役乖離令我感悲欣使情惕理以精神
通匪日形骸隔妙詩申篤好清義賁幽蹟恨無隨
侯珠以酬荆文璧

覽古詩

趙氏有和璧天下無不傳秦人來求市厥價徒空
言與之將見賣不與恐致患簡才

選作

備行李圖

令國命全藺生在下位繆子稱其賢奉辭馳出境
伏軾徑入關秦王御殿坐趙使擁節前揮袂現金
柱身玉要俱捐連城既僞往荆玉亦真還爰在澠
池會二主克交歡昭襄欲負力相如折其端背血
下霑襟怒髮上衝冠西缶終雙擊東瑟不隻彈捨
生豈不易處死誠獨難稜威章臺顛彊禦亦不干

言
屈節邯鄲中
俛首忍回軒
廉公何爲者
負荆謝厥
讐
智勇冠當世
弛張使我歎

時興詩

疊疊圓象運
悠悠方儀廓
忽忽歲云暮
游原采蕭
藿北踰芒與
河南臨伊與
洛疑霜霑蔓
草悲風振
林薄撼撼芳
葉零藥藥芬
華落下泉激
冽清曠野
增遼索登高
眺遐荒極望
無崖壘形變
隨時化神
感因物作澹
乎至人心恬
然存玄漠

重贈劉琨

望
龍因慶雲
翔茨棘非
所憇翰飛
遊高
風余音非
九韻何以
儀鳳凰新
城非芝圃
曷由殖

蘭芳

闕

答劉琨

隨寶產漢濱
摛此夜光真
不待卞和顯
自爲命世

珍

闕

失題

遊舉游名山
松喬共相追
層崖成崇館
巖阿結重

闈

闕

詩紀

卷之十一
晉

郭璞

字景純河東聞喜人文章冠一時尤妙於陰陽算歷卜筮之術王導引為參軍補著作佐郎遷尚書郎以母憂去王敦起為記室

參軍敦既謀逆使筮璞曰無成壽且不久敦大怒即收斬之及敦平追贈弘農太守○詩品曰郭璞詩憲章潘岳文體相輝彪炳可玩始變永嘉平淡之體故稱中興第一翰林以為詩首但游仙之作辭多慷慨乖遠玄宗而云柰何虎豹姿又云戢翼棲榛梗乃是坎壈詠懷非列仙之趣也

贈溫嶠

人亦有言松竹有林及爾臭味異苔同岑言以忘
得交以淡成同匪伊和惟我與生爾神余契我懷
子情携手一豁安知塵冥

游仙詩十四首

京華游俠窟

五臣作客

山林隱遯棲朱門何足榮未若

託蓬萊臨源挹清波陵岡掇丹萸靈谿可潛盤安
事登雲梯漆園有傲吏萊氏有逸妻進則保龍見
退為觸藩抵高蹈風塵外長揖謝夷齊

青溪千餘仞中有一道士雲生梁棟間風出窻戶
裏借問此何誰云是鬼谷子翹迹企穎陽臨河思
洗耳聞闔西南來潛波渙鱗起靈妃顧我笑粲然
啟玉齒蹇修時不存要之將誰使

言終
卷之十一
三
翡翠戲蘭苕容色更相鮮
綠蘿結高林蒙籠蓋一
山中有冥寂士靜嘯撫清絃
放情凌霄外嚼藥挹
飛泉赤松臨上游駕鴻乘紫煙
左挹浮丘袖右拍
洪崖肩借問蜉蝣輩寧知龜鶴年

六龍安可頓運流有代謝時
變感人思已秋復願
夏淮海變微禽吾生獨不化
雖欲騰丹谿雲螭非
我駕愧無魯陽德迴日向三
舍臨川哀年邁撫心
獨悲吒

逸翮思拂霄迅足羨遠游
清源無增瀾安得運吞
舟珪璋雖特達明月難闇投
潛穎怨清陽陵苕哀
素秋悲來惻丹心零淚緣纓流

雜縣音爰寓魯門風暖將爲災
吞舟涌海底高浪駕
蓬萊神仙排雲出但見金銀臺
陵陽挹丹溜容成
揮玉杯嫦娥揚妙音洪崖領其
願升降隨長煙飄
颯戲九垓奇齡邁五龍千歲方
嬰孩燕昭無靈氣
漢武非仙才

晦朔如循環月盈已復魄
蓐收清西陸朱羲將由
白寒露拂陵苕女蘿辭松柏
薜榮不終朝蜉蝣豈

見夕圓丘有奇草鐘山出靈液王孫列八珍安期
鍊五石長揖當途人去來山林客

暘谷吐靈曜扶桑森千一作萬丈朱霞升東山朝日

何晃朗迴風流曲櫺幽室發逸響悠然心永懷眇

爾自遐想仰思舉雲翼延首矯玉掌嘯傲遺世羅

縱情在一作任獨往明道雖若昧其中有妙象希賢

宜勵德羨魚當結網

採藥游名山將以救年頽呼吸玉滋液妙氣盈胸

懷登仙撫龍駟迅駕乘奔雷鱗初學作鱗裳逐電曜雲

蓋隨風迴手頓羲和轡足蹈閭闔開東海猶蹄涔

崑崙螻一作若蟻堆遐邈冥茫中俯視令人哀

璇臺冠崑嶺西海濱招搖瓊林籠藻映碧樹疏英

翹丹泉漂朱沫黑水鼓玄濤尋仙萬餘日今乃見

子喬振髮晞翠霞解褐被絳綃總轡臨少廣盤虬

舞雲輶永偕帝鄉侶千齡共逍遙

登嶽採五芝涉澗將六草散髮蕩玄溜終年不華

皓

四瀆流如淚五嶽羅若垤尋我青雲友永與時人

絕
靜歎亦何念悲此妙齡逝在世無千月命如秋葉
帶蘭生蓬芭間榮曜常幽翳
縱酒濛汜濱結駕尋木末翹手攀金梯飛步登玉
闕左顧擁方目右眷極朱髮

贈潘尼

杞梓生南荆奇才應世出擢穎蓋漢陽鴻聲駭皇
室遂應四科運朱衣耀玉質

失題

見藝文春部
以下闕文

青陽暢和氣谷風穆以溫英蔭擘林蒼昆蟲咸啟
門高臺臨迅流四坐列王孫羽蓋停雲陰翠鬱映
玉樽

同前

見藝文
夏部

羲和騁丹衢朱明赫其猛融風拂晨霄陽精一何
罔閒宇靜無娛端坐愁日永

同前

見初學
記別部

君如秋日雲妾似突中煙高下理自殊一乖雨絕
天

詩紀卷之三十二

晉十二

楊方

字公回少好學有異才司徒王導辟為掾轉東安太守遷司徒參軍事補高梁太守

後以年老棄郡歸終於家

合歡詩二首

虎嘯谷風起龍躍景雲浮同聲好相應同氣自相

求我情與子親譬如影追軀食共並一作根穗飲

共連理杯衣共雙絲絹寢共無縫綢居願接膝坐

行願携手趨子靜我不動子遊我不留齊彼同心

鳥譬此一作比目魚情至斷金石膠漆未爲牢但

願常無別合形作一軀生爲併身物死爲同棺灰
秦氏自言至我情不可儔

磁石引長針陽燧下炎煙宮商聲相和心同自相
親我情與子合亦如影追身寢共織成被絮共同
功綿暑搖比翼扇寒坐併肩氈子笑我心哂子蹙
我無歡來與子共跡去與子同塵齊彼蛩蛩獸舉
動不相捐唯願長無別合形作一身生有同室好
死成併棺民徐氏自言至我情不可陳

襍詩三首

樂府通前作合
歡詩今從玉臺

獨坐空室中愁有數千端悲響答愁歎哀涕應苦

言

玉臺
作心

彷徨四顧望白日入西山不覩佳人來但

見飛鳥還飛鳥亦何樂夕宿自作羣

飛黃銜長轡翼翼回輕輪俯涉淥水澗仰過九層
山修途曲且險秋草生兩邊黃華如沓金白華如
散銀青敷羅翠采絳葩象赤雲爰有承露枝紫榮
合素芬扶蘇重清藻布翹芳且鮮目爲艷采回心
爲奇色旋撫心悼孤客俯仰還自憐踟躕向壁歎

攬筆作此文

南鄰玉臺作林有奇樹承春挺素華豐翹被長條綠葉

蔽朱柯因風吐徽音芳氣入紫霞我心羨此木願

徙著予家夕得游其下朝得弄其葩爾根深且堅

藝文類聚作固予宅淺且洿移植良無期歎息將如何

葛洪字稚川丹陽句容人少以儒學知名尤好神仙導養之法元帝辟為掾以平賊功賜爵關內侯後求為句漏令以就丹砂帝從之

洗藥池

在贛州興國縣洪過境見山靈水秀遂結廬築壇鑿池洗藥雷四言詩一首

洞陰泠泠風珮清清仙居永劫華木長榮

王鑒字茂高堂邑人父濬御史中丞少以文筆著稱初為元帝瑯琊國侍郎時杜弢作逆

王敦不能制鑿勸帝征之會弢已平拜駙馬都尉奉朝請出補永興令

七夕觀織女

牽牛悲殊館織女悼一作怨離家一稔期一宵此期

良可一作且嘉赫奕玄門開飛閣鬱嵯峨隱隱驅千

乘闐闐越星河六龍奮瑤轡文螭負瓊車火丹秉

瑰燭素女執瓊華絳旗若吐電朱一作彩蓋如振霞

雲韶何嘈噉靈鼓鳴相和停軒佇一作紆高盼眷予

在岌峩澤因芳露沾恩附蘭風加明發相從游翩
翩鸞鷲羅同遊不同觀念子憂怨多敬因三視末
以爾屬星娥

熊甫

別歌

晉書曰錢鳳爲王敦鎧曹叅軍知敦有不臣之心相與朋搆專弄威權叅軍熊甫諫敦不聽遂告歸臨別歌曰

徂風飈起蓋山陵氛霧蔽日玉石焚往事旣去可
長歎念別惆悵復會難

梅陶

明帝時爲尚書

怨詩行

庭植不材柳苑育能鳴鶴鼓枝游哇畝棲釣一丘
壑晨悅朝敷榮夕乘南音客晝立薄游景暮宿漢
陰魄庇身蔭王猷罷蹇反幻跡

桓温

字元子譙國龍亢人少有豪邁風氣累遷琅邪內史進征西大將軍大司馬卒謚宣

武侯

八陣圖

望古識其真臨源愛往跡恐君遺事節聊下南山

石

王彪之

字叔虎初除著作郎累遷吏部尚書後為鎮軍將軍會稽內史孝武即位遷尚

書令卒

登會稽刻石山

隆山嵯峩崇巒岩堯傍觀滄洲仰拂玄霄文命遠
會風淳道遼秦皇遐巡邁茲英豪宅靈基阿銘跡
峻嶠青陽曜景時和氣淳脩嶺增鮮長松挺新飛
鴻振羽騰龍躍鱗
與諸兄弟方山別詩

脂車總馳輪汎舟理飛棹絲染墨悲歎路岐楊感

悼闕

謝尚

字仁祖陳郡人累遷尚書僕射出督江淮歷陽楊豫諸軍事進號鎮西將軍桓温請為司州都督以疾不行卒於歷陽

大道曲

樂府廣題曰謝尚為鎮西將軍嘗著紫羅襦據胡牀在市中佛國門樓上彈琵琶作大道曲市人不知是三公也

青陽二三月柳青桃復紅車馬不相識音落黃埃

中

詩已

卷之二十三 晉

言
孫綽

字興公統之弟博學善屬文爲著作佐郎累遷散騎常侍轉廷尉卿領著作卒

表哀詩

并序

天地之德曰生生之所恃者親親存則歡泰情盡親亾則哀悴理極故老萊婆娑於膝下曾閔泣血於終年哀悼之思至矣自然之性篤矣余以薄祜夙遭閔凶越在九齡嚴考卽世未及志學過庭無聞天覆旣淪俯憑坤厚殖根外氏賴以成訓然以不才不能負荷仁妣弘母儀之德邁榮寒之操雕琢固頑勉以道義庶幾砥礪犬

馬之報豈悟一朝復見孤棄上天極禍怨痛莫訴皆由惡積咎深不能通感自丁荼毒載離寒暑茵帷塵寂棟宇寥恍仰悲軌跡長自矜悼不勝哀號作詩一首敢冒諒闇之譏以申罔極之痛詩曰

茫茫太極賦受理殊咨生不辰仁考宿

一作風

徂微

微冲弱眇眇偏孤叩心昊蒼痛貫黃壚肅我以義鞠我以仁嚴邁商風恩洽陽春昔聞鄒母勤教善分懿矣慈妣曠世齊運嗟予小子譬彼土糞俯愧

陋質仰忝高訓悠悠玄運四氣錯序自我酷痛載
離寒暑寥寥空堂寂寂響戶塵蒙几筵風生棟宇
感昔有恃望晨遲顏婉變懷袖極願盡歡柰何慈
妣歸體幽挺酷矣痛深剖髓摧肝

三月三日

姑洗幹運首陽穆闡嘉卉萋萋温風暖暖言滌長
瀨聊以游衍縹芥渙流綠柳蔭坂羽從風飄鱗隨
浪轉

秋日

蕭瑟仲秋日飈唳風雲高山居感時變遠客興長
謠踈林積涼風虛岫結凝霄湛露灑庭林密葉辭
榮條撫菌藝文作葉悲先落鬱一作攀松羨後凋垂綸在
林野交情遠市朝澹然古懷心濠上豈伊遙

情人碧玉歌二首

碧玉歌一名千金意晉孫綽所作樂府詩集云宋汝南王作

碧玉小家女不敢攀貴德感郎千金意慙無傾城
色

碧玉破瓜時郎爲情顛倒感君不羞赧迴身就郎

抱

王獻之

字子敬羲之子少有盛名而高邁不羈風流為一時之冠起家州主簿秘書丞

選尚新安公主尋除建威將軍吳興太守徵拜中書令卒於官

桃葉歌二首

古今樂錄曰桃葉歌者晉王子敬之所作也桃葉子敬妾名緣於篤愛所以歌之

桃葉復桃葉渡江不用楫但渡無所苦我自來迎

接

藝文作我自接迎汝

桃葉復桃葉桃樹連桃根相憐兩樂事獨使我殷

勤

藝文作纏綿

江道

字道載陳畱圉人避亂臨海為蔡謨何充所引用以家貧求為太末令遷吳令殷浩

謀北伐請為諮議參軍升平中累遷太常卒

詠秋

祝融解炎轡薜收起涼駕高風催節變凝露督物

化長林悲素秋茂草思朱夏鳴雁薄雲嶺蟋蟀吟

深榭寒蟬向

一作竟

夕號驚飈激中夜感物增人懷

悽然無欣暇

詠貧

華門不啟扉環堵蒙

初學作滿

蒿榛空瓢覆壁下簞上

自生塵出門誰氏子憊哉一何貧

庾闡

字仲初潁川人性好學九歲能屬文初爲西陽王掾累遷尚書郎蘇峻之難出奔郗鑒爲之參軍峻平召爲散騎侍郎補零陵太守徵拜給事中

孫登隱居詩

靈巖霞蔚石室鱗構青松標空蘭泉吐牖龍蒼可
游芳津可漱玄谷蕭寥鳴琴獨奏先生體之寂坐
幽岸凝冰結樸熙陽靡煥潛真內全飛榮外散凌
崖高嘯希風朗彈道有冥廢運有昏消達隱不巖

玄跡不標或曰先生晦德逍遙稽子秀達英風朗
烈道雋薰芳鮮不玉折兆動初萌妙鑒奇絕翹首
丘冥仰想玄哲

三月三日臨曲水

暮春濯清汜游鱗泳一壑高泉吐東岑洄瀾自淨
樂臨川疊曲流豐林映綠薄輕舟沈飛觴鼓柁觀
魚躍

三月三日

心結湘川渚目散冲霄外清泉吐翠流淥醺漂素

瀨悠想盼長川輕瀾渺如帶

觀石鼓

石鼓山名

命駕觀奇逸徑驚造靈山朝濟清溪岸夕憇五龍
泉鳴石含潛響雷駭震九天妙化非不有莫知神
自然翔霄拂翠嶺綠澗漱巖間手澡春泉潔目翫
陽葩鮮

登楚山

拂駕升西嶺寓目臨浚波想望七德耀詠此九功
歌龍駟釋陽林朝服集三河回首盼宇宙一無濟

邦家

衡山

北眺衡山首南睨

初學作瞻

五嶺末寂坐挹虛恬運目

情四豁翔虬凌九霄陸鱗困濡沫未

藝文作既

體江湖

悠安識南溟濶

江都遇風

天吳踊靈壑將駕奔冥霄飛廉振折木流

一作靈

景

登扶搖洪川佇宿浪躍水迎晨潮仰盼感玄雲俯

聽聒悲飈

詩已

卷之十一

晉

採藥詩

採藥靈山嶠結駕登九嶷懸巖溜石髓芳谷挺丹
芝泠泠雲珠落漼漼石密滋鮮景染冰顏妙氣翼
冥期霞光煥藿靡虹景照參差椿壽自有極槿花
何用疑

遊仙詩四首

邛疏鍊石髓赤松漱水玉憑煙眇封子流浪揮玄
俗崆峒臨北戶昆吾眇南陸層霄映紫芝潛澗汎
丹菊崑崙涌五河八流縈地軸

三山羅如栗巨壑不容刀白龍騰子明朱鱗運琴
高輕舉觀滄海眇邈去瀛洲玉泉出靈鳧瓊草被

神丘

神嶽竦丹青玉堂臨雪嶺上採瓊樹華下挹瑤泉

井

闕

南海納朱濤玄波灑北溟仰盼燭龍曜俯步朝廣

庭

闕

同前六首

熒熒丹桂紫芝結根雲山九疑鮮榮夏馥冬熙誰

與薄采松期

赤松遊霞乘煙封子鍊骨凌仙晨漱水玉心玄故
能靈化自然

乘彼六氣渺茫輜駕赤水崑陽遙望至人玄堂心
與罔象俱忘

朝餐雲英玉藥夕挹玉膏石髓瑤臺藻構霞綺鱗
裳羽蓋級纒

玉樹標雲翠蔚靈崖獨拔奇卉芳津蘭瑩珠隧碧
葉灌清鱗萃

玉房石榭磊砢燭龍銜輝吐火朝採石英澗左夕
翳瓊葩巖下

李充

字弘度江夏人辟丞相王導掾除剡縣令後爲大著作郎累遷中書侍郎卒

嘲友人

同好齊歡愛纏綿一何深子旣識我情我亦知子
心燕婉歷年歲和樂如瑟琴良辰不我俱中闊似
商參爾隔北山陽我分南川陰嘉會罔克從積思
安可任目想妍麗姿耳存清媚音脩晝興永念遙
夜獨悲吟逝將尋行役言別泣沾巾願爾降玉趾

一顧重千金

七月七日

朗月垂玄景洪漢截皓蒼牽牛難牽牛

一作織女

守空箱

一作襄

河廣尚可越怨此漢無梁

送許從詩

來若迅風歡逝如歸雲征離合理之常聚散安足

驚

李顥

充之子有文義多所述作郡舉孝廉

經渦路作

言歸越東足逝將反上都後洹填中路改轍脩茲衢旦發石亭境夕宿桑首墟勁焱不與潤零雨莫能濡亢陽彌十旬涓滴未暫舒泉流成平陸結駟可迴車肇允相忘鱗翻爲涸池魚咫尺步不能移白日奄桑榆

涉湖

旋經義興境弭

初學記作頓

棹石蘭渚震澤爲何在

唯太湖浦圓徑縈五百眇目緬無覩高天森若岸長津襍如縷窈窕尋灣漪迢遞望巒嶼驚飈揚飛

湍浮霄薄懸岨輕禽翔雲漢游鱗憇中滄黯藹天
時陰岩堯舟航舞憑河安可殉靜觀戒征旅

夏日

炎光爍

藝文作爍

南溟溽暑融三夏霽霽重雲蔭砢稜

震雷叱

闕

感冬篇

高陽攬玄轡太皞御冬始望舒游天策曜靈協燕

紀

闕

袁宏

字彥伯陳郡人有逸才文章絕美謝尚引為參軍累遷大司馬桓溫府記室後自吏

部郎出為東陽太守卒○詩品曰彥伯詠史雖文體未遒而鮮明緊健去凡俗遠矣

從征行方頭山

峩峩太行凌虛抗勢天嶺交氣窈然無際澄流入

神玄谷應契四象悟心幽人來憇

詠史二首

世說曰袁虎少貧嘗為人傭載運租謝鎮西經船行其夜清風朗月聞估客船上詠詩聲甚有情致即遣訊問乃是表自詠其所作詠史詩因此相要大相賞得虎表宏小字也

周昌梗槩臣辭達不為訥汲黯社稷器棟梁天表

骨陸賈厭解紛時與酒檮杌婉轉將相門一言和
平勃趨舍各有之俱令道不沒

無名困蝼蟻有名世所疑中庸難為體狂狷不及
時楊惲非忌貴知及有餘辭躬耕南山下蕪穢不
遑治趙瑟奏哀音秦聲歌新詩吐音非凡唱負此
欲何之

擬古

高館百餘仞迢遞虛中亭文幌曜瓊扇碧疏映綺

櫺闕

失題見藝文
松部

森森千尺松磊砢非一節雖無榱桷麗較為梁棟

桀闕

曹毗字輔佐譙國人少好文籍善屬詞賦郡察
孝廉除郎中蔡謨舉為佐著作郎累遷至

光祿
勳

詠史

軒轅應玄期幼能總百神體鍊五靈妙氣含雲露
津慘石曾城岫鍊鼎荆山濱豁焉天扉開飄然跨
騰鱗儀轡灑長風褰裳躡紫宸

詠冬

縣邈冬夕

初學記作宵

永凜厲寒氣升離葉向晨落長

風振條興夜靜輕響起天清月暉澄寒冰盈渠結

素霜竟欄凝今載忽已暮來紀

初學作正

奄復仍

夜聽禱衣

寒興御紈素佳人理衣衾

一作治衣襟

冬夜清且永皓

月照堂陰纖手疊輕素朗杵叩鳴砧清風流繁節

迴飈灑微吟嗟此嘉運速悼彼幽滯心二物感余

懷豈但聲與音

正朝

靈春散初澤焚煜青陽舒佳袍忽已故今載奄復

初軟節暢宇宙和風被八區

闕

霖雨

洪霖彌旬日翳翳四區昏紫電光飛牖迅雷終天

奔

闕

許詢

字玄度高陽人總角秀惠衆稱神童長而風情簡素司徒掾辟不就蚤卒○簡文稱

許掾云玄度五言詩可謂妙絕時人

竹扇

良工眇芳林妙思觸物騁篋疑秋蟬翼團取望舒景

習鑿齒

字彥威襄陽人博學洽聞以文章著稱桓溫辟為從事累遷別駕遷衡陽太守

歸以疾

燈

一作詠籠燈

煌煌閒夜燈脩脩樹間亮燈隨風燁燁風與燈升

降

表山松

陳郡陽夏人喬之孫也少有才名博學有文章歷吳郡太守孫恩作亂山松守

滬瀆城城陷被害

菊

靈菊植幽崖擢穎陵寒飈春露不染色秋霜不改

條

顧愷之

字長康晉陵無錫人博學有才氣桓溫引為大司馬參軍後為殷仲堪參軍

神情詩

亦見陶集

春水滿四澤夏雲多奇峯秋月揚明輝冬嶺秀寒

松

摘句

劉恢

字道生沛國人識局明濟有文武才為車騎司馬年三十六卒贈前將軍

失題

見藝文馬部

東臯有一駿名曰千金駒絡首纏駿尾養以甘露

芻闕

詩紀卷之三十二終

詩紀卷之三十三

晉十三

蘭亭集詩 并序

右將軍王羲之二首

字逸少瑯琊臨沂人善草隸累遷江州刺

史右軍將軍會稽內史

永和九年歲在癸丑暮春之初會於會稽山陰之蘭亭修禊事也羣賢畢至少長咸集此地有崇山峻嶺茂林修竹又有清流激湍映帶左右引以為流觴曲水列坐其次雖無絲竹管絃之

盛一觴一詠亦足以暢叙幽情是日也天朗氣
清惠風和暢仰觀宇宙之大俯察品類之盛所
以遊目騁懷足以極視聽之娛信可樂也夫人
之相與俯仰一世或取諸懷抱悟言一室之內
或因寄所託放浪形骸之外雖趨舍萬殊靜躁
不同當其欣於所遇蹙得於已快然自足不知
老之將至及其所之既倦情隨事遷感慨係之
矣向之所欣俛仰之間以爲陳迹猶不能不以
之興懷况修短隨化終期於盡古人云死生亦
大矣豈不痛哉每攬昔人興感之由若合一契
未嘗不臨文嗟悼不能喻之於懷固知一死生
爲虛誕齊彭殤爲妄作後之視今亦由今之視
昔悲夫故列敘時人錄其所述雖世殊事異所
以興懷其致一也後之攬者亦將有感於斯文
代謝鱗次忽焉以周欣此暮春和氣載柔詠彼舞
雩異世同流迺携齊契散懷一丘

仰視碧天際俯瞰滌水濱寥聞無涯觀寓目理自
陳大矣造化工萬殊莫不均羣籟雖參差適我無

非親

瑯琊王友謝安二首

字安石尚之弟官太保都督封廬陵郡公

伊昔先子有懷春遊契茲言執寄傲林丘森森連

嶺茫茫原疇迥霄垂霧凝泉散流

相與欣佳節率爾同褰裳薄雲羅景物微風翼輕

航醇醪陶丹府兀若游羲唐萬殊混一理安復覺

彭殤

司徒左西屬謝萬二首

字萬石太傅安弟也才氣高俊蚤知

名歷吏部西中郎將豫州刺史散騎常侍

肆眺崇阿寓目高林青蘿翳岫脩竹冠岑谷流清

響條鼓鳴音玄嶠吐潤霏霧成陰

司冥卷陰旗句芒舒陽旌靈液被九區光風扇鮮

榮碧林輝翠萼紅葩擢新莖翔禽撫翰游騰鱗躍

清泠

前餘杭令孫統二首

字承公太原中都人楚之孫

茫茫大造萬化齊軌罔悟云

一作玄

同競異標旨平

勃運謀黃綺隱几凡我仰希期山期水

地主觀山水仰尋幽人踪回沼激中逵踈竹間脩

言終
卷之十三
三
桐因流轉輕觴冷風颺落松時禽吟長澗萬籟吹
連峯

左司馬孫綽二首

春詠登臺亦有臨流懷彼伐木宿

一作肅

此良儔脩

竹蔭沼旋瀨縈丘穿池激湍連濫觴舟

流風拂枉渚停雲蔭九臯鶯語吟脩竹游鱗戲瀾

濤携筆落雲藻微言剖纖毫時珍豈不甘忘味在

聞韶

中軍參軍孫嗣

綽之子

望巖懷逸許臨流想竒莊誰云真風絕千載挹餘

一作遺芳

散騎常侍郝曇

字重熙高平金鄉人官至徐兗二州刺史

溫風起東谷和氣振柔條端坐與遠想薄言游近

郊

潁川庾友

字惠彥小字玉臺潁川鄆陵人歷中書郎東陽太守

馳心域表寥寥遠邁理感則一冥然斯會

潁川庾蘊

仰想虛舟說俯歎世上賓朝榮雖云樂夕斃理自

因

行參軍曹茂之

字永世彭城人仕至尚書郎

時來誰不懷寄散山林間尚想方外賓迢迢有餘

閒

上虞令華茂

廣陵人元帝時嗣父爵封都亭侯

林榮其鬱浪激其隈汎汎輕觴載欣載懷

榮陽桓偉

按晉書桓偉譙國龍亢人玄之兄玄為荊州以偉為冠軍將軍

後加安西將軍荊州刺史此云榮陽未知是否

主人雖無懷應物貴有尚宣尼邀沂津蕭然心神

王數子各言志曾生發清唱今我欣斯遊愜情亦

整暢

陳郡袁嶠之二首

晉書袁嶠字彥叔陳郡陽夏人桓温引為廣陵

相遷江夏桓温伐蜀進號龍驤將軍未知是否

人亦有言得意則歡佳賓即臻相與遊盤微

一作微

音迭詠馥焉若蘭苟齊一致遐想揭竿

四眺華林茂俯仰晴

一作清

川渙激水流芳醪豁爾

累心散遐想逸民軌遺音良可玩古人詠舞雩今

也同斯歎

王玄之 羲之長子早卒

松竹挺巖崖幽澗激清流消散肆情志酣暢豁滯

憂

王凝之二首 字叔平羲之第二子也歷江州刺史左將軍會稽內史孫

恩攻會稽為恩所害

莊浪濠津巢步潁湄冥心真寄千載同歸

烟熅柔風扇熙怡和氣淳駕言典時遊逍遙映通

津

王肅之二首 字幼恭羲之第四子歷中書郎驃騎諮議

在昔暇日味存林嶺今我斯遊神怡心靜

嘉會欣時遊豁爾暢心神吟詠曲水瀨淥波轉素

鱗

王徽之二首 字子猷羲之第五子卓犖不羈欲為傲達仕至黃門侍郎

散懷山水蕭然忘羈秀薄粲潁踈松籠崖游羽扇

霄鱗躍清池歸日寄歡心冥二奇

先師有冥歲安用羈世羅未若保冲真齊契箕山

阿

王渙之

去來悠悠子披褐良足欽超跡修獨往真契齊古
今

王彬之二首

丹崖竦立葩藻映林淥水揚波載浮載沈

鮮葩映林薄游鱗戲清渠臨川欣投釣得意豈在
魚

王蘊之

散豁情志暢塵纓忽已捐仰詠挹餘

一作遺

芳怡情

味重淵

行叅軍王豐之

肆盼巖岫臨泉濯趾感興魚鳥安居幽時

郡公曹魏滂

三春陶和氣萬物齊一歡明后欣時豐駕言映清
瀾疊疊德音暢蕭蕭遺世難望巖愧脫屣臨川謝
揭竿

鎮軍司馬虞說

神散宇宙內形浪濠梁津寄暢須臾歡尚想味古
人

郡五官謝繹

縱暢任所適回波縈游鱗千載同一朝沐浴陶清
塵

行叅軍徐豐之二首

俯揮素波仰掇芳蘭尚想嘉客希風永歎

清響擬絲竹班荆對綺䟽零觴飛曲津歡然朱顏
舒

徐州西平曹肇

願與達人游解結邀濠梁狂吟任所適浪流無何

鄉

後序

孫綽

古人以水喻性有旨哉非所以淳之則清淆之
則濁耶故振轡於朝市則克屈之心生閒步於
林野則寥落之意興仰瞻羲唐邈然遠矣近詠
臺閣顧探增懷聊於曖昧之中期乎瑩拂之道
暮春之始襍於南澗之濱高嶺千尋長湖萬頃
乃藉芳草鑑清流覽卉物觀魚鳥具類同榮資
生成暢於是和以醇醪齊以達觀快然兀矣焉

復覺鵬鷄之二物哉耀靈縱轡急景西邁樂與
時去悲亦系之往復推移新故相換今日之迹
明復陳矣原詩人之致興諒歌詠之有由文多
不載大畧如此所賦詩亦裁而綴之如前四言
五言焉

詩紀卷之三十三終

詩紀卷之三十四

晉十四

陶淵明

字元亮入宋名潛潯陽柴桑人太尉長沙公侃之曾孫少有高趣親老家貧起

爲州祭酒不堪吏職解歸躬耕自資隆安中
爲鎮軍參軍義熙元年遷建威參軍未幾求
爲彭澤令在縣八十餘日解歸暨入宋終身
不仕顏延年誄之謚曰靖節徵士○詩品曰
其源出於應璩又協左思風力文體省靜殆
無長語篤意高古辭興婉愜每觀其文想其
人德世歎其質直至如歡言酌春酒日暮天
無雲風華清靡豈直爲田家語耶古今隱逸
詩人之宗也

停雲

四章并序
以下四言

言終
卷之十四
停雲思親友也罇湛新醪園列初榮願言不從
歎息彌襟

靄靄停雲濛濛時雨八表同昏平路伊阻靜寄東
軒春醪獨撫良朋悠邈搔首延佇

停雲靄靄時雨濛濛八表同昏平陸成江有酒有
酒閒飲東窓願言懷人舟車靡從

東園之樹枝條再榮競用新好以招余情人亦有
言日月于征安得促席說彼平生

翩翩飛鳥息我庭柯歛翮閒止好聲相和豈無他
人念子實多願言不獲抱恨如何

時運

四章

并序

時運遊暮春也春服旣成景物斯和偶影獨遊
欣慨交心

邁邁時運穆穆良朝襲我春服薄言東郊山滌餘
靄宇曖微霄有風自南翼彼新苗

洋洋平津乃漱乃濯邈邈遐景載欣載矚稱心而
言人亦易足揮茲一觴陶然自樂

延目中流悠悠清沂童冠齊業閒詠以歸我愛其

詩經
卷之十四
靜寤寐交揮但恨殊世邈不可追
斯晨斯夕言息其廬花藥分列林竹翳如清琴橫
牀濁酒半壺黃唐莫逮慨獨在予

榮木

四章

并序

榮木念將老也日月推遷已復有夏總角聞道
白首無成

采采榮木結根于茲晨耀其華夕已喪之人生若
寄顛顛有時靜言孔念中心悵而

采采榮木于茲托根繁華朝起慨暮不存貞脆由
人禍福無門匪道曷依匪善奚敦
嗟予小子稟茲固陋徂年旣流業不增舊志彼弗
舍安此日富我之懷矣怛焉內疚
先師遺訓余豈云墜四十無聞斯不足畏脂我名
車策我名驥千里雖遙孰敢不至

勸農

六章

悠悠上古厥初生人傲然自足抱朴含真智巧旣
萌資待靡因誰其贍之實賴哲人
哲人伊何時惟后稷贍之伊何實曰播殖舜旣躬

言終
卷之十四
耕禹亦稼穡遠若周典八政始食

熙熙令音猗猗原陸卉木繁榮和風清穆紛紛士

女趣

一作趨

時競逐桑婦宵征農夫野宿

氣節易過和澤難久冀缺携儷沮溺結耦相彼賢
達猶勤壟畝矧伊衆庶曳裾拱手

民生在勤勤則不匱宴安自逸歲暮奚冀儋石不
儲饑寒交至顧爾儔列能不懷愧

孔耽道德樊須是鄙董樂琴書田園不履若能超
然投迹高軌敢不歛衽敬讚德美

命子

十章

悠悠我祖爰自陶唐邈爲虞賓歷世重光御龍勤
夏豕韋翼商穆穆司徒厥族以昌

紛紛戰國漠漠衰周鳳隱於林幽人在丘逸蚪遶
雲奔鯨駭流天集有漢眷予愍矻

於赫愍侯運當攀龍撫劍夙邁顯茲武功書誓山
河啓土開封疊疊丞相允迪前蹤

渾渾長源蔚蔚洪柯羣川載導衆條載羅時有語
默運因隆衆在我中晉業融長沙

桓桓長沙伊勲伊德天子疇我專征南國功遂辭

歸臨寵不忒

一作忒

孰謂斯心而近可得

肅矣我祖慎終如始直方二臺惠和千里於皇仁
考淡焉虛止寄迹風雲寘茲愠喜

嗟予寡陋瞻望弗及顧慙華髮負影隻立三千之
罪無後爲急我誠念哉呱聞爾泣

卜云嘉日占亦良時名汝曰儼字汝求思溫恭朝
夕念茲在茲尚想孔伋庶其企而

厲夜生子遽而求火凡百有心奚特於我旣見其
生實欲其可人亦有言斯情無假

日居月諸漸免於孩福不虛至禍亦易來夙興夜
寐願爾斯才爾之不才亦已焉哉

贈長沙公族祖

四章

并序

長沙公於余爲族祖同出大司馬昭穆旣遠已
爲路人經過潯陽臨別贈此

同源分流人易世踈慨然寤歎念茲厥初禮服遂
悠歲月眇徂感彼行路眷然躊躇

於穆令族允構斯堂諧氣冬暄映懷圭璋爰采春

言紀 卷之十四 五
花載警秋霜我曰欽哉實宗之光

伊余云邁在長忘同笑言未久逝焉西東遙遙三湘滔滔九江山川阻遠行李時通

何以寫心貽此話言進簣雖微終焉爲山敬哉離人臨路悽然款襟或遠音問其先

酬丁柴桑 二章

有客有客爰來爰止秉直司聰於惠百里食勝如歸聆善若始

匪惟諧也屢有良由載言載眺以寫我憂放歡一

遇既醉還休實欣心期方從 一作我遊

答龐參軍 六章 并序

龐爲衛軍參軍從江陵使上都過潯陽見贈

衡門之下有琴有書載彈載詠爰得我娛豈無他

好樂是幽居朝爲灌園夕偃蓬廬

人之所寶尚或未珍不有同愛云胡以親我求良友寔覲懷人懽心孔洽棟宇惟鄰

伊余懷人欣德孜孜我有旨酒與汝樂之乃陳好言乃著新詩一日不見如何不思

嘉遊未數誓將離分送爾於路銜觴無欣依舊
楚邈邈西雲之子之遠良話曷聞

昔我云別倉庚載鳴今也遇之雪霰飄零大藩有
命作使上京豈忘宴安王事靡寧

慘慘寒日肅肅其風翩彼方舟客裔江中

一作容與冲冲

勗哉征人在始思終敬茲良辰以保爾躬

歸鳥 四章

翼翼歸鳥晨去於林遠之八表近憩雲岑和風不
洽翩翩求心顧儔相鳴景庇清陰

翼翼歸鳥載翔載飛雖不懷遊見林情依遇雲頡
頏相鳴而歸遐路誠悠性愛無遺

翼翼歸鳥馴林徘徊豈思天路欣及舊棲雖無昔
侶衆聲每諧日夕氣清悠然其懷

翼翼歸鳥戢羽寒條遊不曠林宿則森標晨風清
興好音時交矰繳奚施已卷安勞

卷與倦同

遊斜川 并序○以下五言

辛丑歲正月五日天氣澄和風物閑美與二三
隣曲同遊斜川臨長流望曾城魴鯉躍鱗於將

夕水鷗乘和以翻飛彼南阜者名實舊矣不復
乃爲嗟嘆若夫曾城傍無依接獨秀中阜遙望
靈山有愛嘉名欣對不足率爾賦詩悲日月之
遂往悼吾年之不留各疏年紀鄉里以記其時
日

開歲倏五日吾生行歸休念之動中懷及辰爲茲
遊氣和天惟澄班坐依遠流弱湍馳文魴閑谷矯
鳴鷗迴澤散游目緬然睇曾丘雖微九重秀顧瞻
無匹儔提壺接賓侶引滿更獻酬未知從今去當
復如此不中觴縱遙情忘彼千載憂且極今朝樂
明日非所求

示周續之祖企謝景夷三郎

時三人皆
講禮校書

負病頽簷下終日無一欣藥石有時閑念我意中
人相去不尋常道路邈何因周生述孔業祖謝響
然臻道喪向千載今朝復斯聞馬隊非講肆校書
亦已勤老夫有所愛思與爾爲隣願言誨諸子從
我頽水濱

怨詩楚調示龐主簿鄧治中

龐遵

言終 卷之十四
天道幽且遠鬼神茫昧然結髮念善事僂俛六九
一作年弱冠逢世阻始室喪其偏炎火屢焚如螟
蠹恣中田風雨縱橫至收歛不盈屢夏日長抱饑
寒夜無被眠造夕思雞鳴及晨願鳥遷在已亦何
怨一作何離憂悽目前吁嗟身後名於我若浮煙
慷慨獨悲歌鍾期信爲賢

答龐參軍 并序

三復來貺欲罷不能自爾隣曲冬春再交款然
良對忽成舊游俗諺云數面成親舊况情過此

者乎人事好乖便當語離楊公所歎豈惟常悲
吾抱疾多年不復爲文本旣不豐復老病繼之
輒依周孔往復之義且爲別後相思之資

相知何必舊傾蓋定前言有客賞我趣每每顧林
園談諧無俗調所說聖人篇或有數斗酒閑飲自
懽然我寔幽居士無復東西緣物新人惟舊弱毫
多所宣情通萬里外形迹滯江山君其愛體素來
會在何年

五月旦作和戴主簿

虛舟縱逸棹回復遂無窮發歲始俛仰星紀奄將
中南窓罕悴物北林榮且豐神淵寫時雨晨色奏
景風旣來孰不去人理固有終居常待其盡曲肱
豈傷冲遷化或夷險肆志無宓隆卽事如已高何
必升華嵩

和劉柴桑

山澤久見招胡事乃躊躇直爲親舊故未忍言索
居良辰入奇懷挈杖還西廬荒塗無歸人時時見
廢墟茅茨已就治新疇復應畚谷風轉淒薄春醪
解饑劬弱女雖非男慰情良勝無栖栖世中事歲
月共相踈耕織稱其用過此奚所須去去百年外
身名同翳如

酬劉柴桑

窮居寡人用時忘四運周欄庭多落葉慨然知已
秋新葵鬱北牖嘉穉養南疇今我不爲樂知有來
歲不命室携童弱良日登遠遊

和郭主簿二首

藹藹堂前林中夏貯清陰凱風因時來回飈開

一作

吹我襟息交遊閑業臥起弄書琴園蔬有餘滋舊
穀猶儲今營已良有極過足非所欽春秫作美酒
酒熟吾自斟弱子戲我側學語未成音此事真復
樂聊用忘華簪遙遙望白雲懷古一何深
和澤周三春清涼素秋節露凝無游氛天高肅景
澈陵岑聳逸峯遙瞻皆奇絕芳菊開林耀青松冠
巖列懷此貞秀姿卓爲霜下傑銜觴念幽人千載
撫爾訣檢素不獲展厭厭竟良月

贈羊長史

并序

左軍羊長史銜使秦川作此與之

愚生三季後慨然念黃虞得知千載外

正一作賴

古人書賢聖留餘跡事事在中都豈忘游心目關
河不可踰九域甫已一逝將理舟輿聞君當先邁
負病不獲俱路若經商山爲我少躊躇多謝綺與
角精爽今何如紫芝誰復採深谷久應蕪駟馬無
貫患貧賤有交娛清謠結心曲人乖運見踈擁懷
累代下言盡意不舒

歲暮和張常侍

市朝悽舊人驟驥感悲泉
明日且非今日歲暮余何
言素顏歛光潤白髮一已
繁潤哉秦穆談旅力豈
未愆向夕長風起寒雲沒
西山厲厲氣遂嚴紛紛
飛鳥還民生鮮常在矧伊
愁苦纏屢闕清酤至無
以樂當年窮通靡攸慮顛
顛由化遷撫已有深懷
履運增慨然

和胡西曹示顧賊曹

蕤賓五月中清朝起南颺
不駛亦不遲飄飄吹我
衣重雲蔽白日閑雨紛
微微流日視西園曄曄榮
紫葵於今甚可慶柰何當
復衰感物願及時每恨
靡所揮悠悠待秋稼寥落
將賒遲逸想不可淹猖
狂獨長悲

癸卯十二月中作與從弟敬遠

寢跡衡門下邈與世相絕
顧盼莫誰知荆扉晝長
閉必結切淒淒歲暮風翳翳
經日雪傾耳無希聲在

目皓已潔

或作結

勁氣侵襟袖簞瓢謝屢設
蕭索空

宇中了無一可悅歷覽千
載書時時見遺烈高操
非所攀深得固窮節平津
苟不由栖遲詎爲拙寄

言系 卷之十四
意一言外茲契誰能別

與殷晉安別

并序

殷先作晉安南府長史掾因居潯陽後作太尉
參軍移家東下作此以贈

游好非久長

一作少長

一遇盡殷勤信宿酬清話益復

知爲親去歲家南里薄作少時隣負杖肆游從淹
留忘宵晨語默自殊勢亦知當乖分未謂事已及
興言在茲春飄飄西來風悠悠東去雲山川千里
外言笑難爲因才華集作良才不隱世江湖多賤貧脫
有經過便念來存故人

於王撫軍座送客

秋日淒且厲百卉具已腓爰以履霜節登高餞將
歸寒氣冒山澤游雲倏無依洲渚思綿邈風水互
乖違瞻夕欲良讌離言聿云悲晨鳥暮來還懸車
歛餘暉逝止判殊路旋駕悵遲遲目送回舟遠情
隨萬化遺

始作鎮軍參軍經曲阿作

弱齡寄事外委懷在琴書被褐欣自得屢空常晏

如時來苟冥會宛轡

集作婉變

憇通衢投策命晨裝暫

與園田

一作林

踈眇眇孤舟逝綿綿歸思紆我行豈

不遙登降

一作陟

千里餘目倦川途異心念山澤居

望雲慙高鳥臨水愧游魚真想初在襟誰謂形跡

拘聊且憑化遷終返班生廬

庚子歲五月中從都還阻風於規林二首

行行循歸路計日望舊居一欣侍溫顏再喜見友

于鼓棹路岐曲指景限西隅江山豈不險歸子念

前途凱風負我心戢柁守窮湖高莽眇無界夏木

獨森踈誰言客舟遠近瞻百里餘延目識南嶺空

歎將焉如

自古歎行役我今始知之山川一何曠巽坎難與

期崩浪聒天響長風無息時久遊戀所生如何淹

在茲靜念園林好人間良可辭當年詎有幾縱心

復何疑

辛丑歲七月赴假還江陵夜行塗口作

閑居三十載遂與塵事冥詩書敦宿好林園無俗

情如何捨此去遙遙至南

一作西

荆叩柁新秋月臨

流別友生涼風起將夕夜景湛虛明昭昭天宇濶
 晶晶川上平懷役不遑寐中宵尚孤征商歌非吾
 事依依在耦耕投冠旋舊墟不為好爵榮一作榮
 真衡茅下庶以善自名一作養

乙巳歲三月為建威叅軍使都經錢溪

我不踐斯境歲月好已積晨夕看山川事事悉如
 昔微雨洗高林清飈矯雲翮眷彼品物存義風都
 未隔伊余何為者勉勵從茲後一形似有制素襟
 不可易園田日夢想安得久離析終懷在歸壑一作壑

舟諒哉宜

一作負霜栢

詠二疎

大象轉四時功成者自去借問衰周來幾人得其
 趣游目漢廷中二疎復此舉高嘯返舊居長揖儲
 君傳餞送傾皇朝華軒盈道路離別情所悲餘榮
 何足顧事勝感行人賢哉豈常譽厭厭閭里歡所
 營非近務促席延故老揮觴道平素問金終寄心
 清言曉未悟放意樂餘年遑恤身後慮誰云其人
 亡久而道彌著

詠三良

彈冠乘通津但懼時我遺服勤盡歲月常恐功愈
微忠情謬獲露遂爲君所私出則陪文輿入必侍
丹帷箴規向已從計議初無虧一朝長逝後願言
同此歸厚恩固難忘君命安可違臨穴罔惟一作遲
疑投義志攸希荆棘籠高墳黃鳥聲正悲良人不
可贖泫然沾我衣

詠荆軻

燕丹善養士志在報強嬴招集百夫良歲暮得荆

卿君子死知己提劍出燕京素驥鳴廣陌慷慨送
我行雄髮指危冠猛氣克長纓飲餞易水上四座
列羣英漸離擊悲筑宋意唱高聲蕭蕭哀風逝淡
淡寒波生商音一作聲更流涕羽奏壯士驚心知去
不歸且有後世名登車何時顧飛蓋入秦庭凌厲
越萬里逶迤過千城圖窮事自至豪主正怔營惜
哉劍術踈奇功遂不成其人雖已沒千載有餘情

桃花源詩

并記

晉太元中武陵人捕魚爲業緣溪行忘路之遠

近忽逢桃花林夾岸數百步中無雜樹芳草鮮
美落英繽紛漁人甚異之復前行欲窮其林林
盡水源便得一山山有小口髣髴若有光便捨
船從口入初極狹纔通人復行數十步豁然開
朗土地平曠屋舍儼然有良田美池桑竹之屬
阡陌交通雞犬相聞其中往來種作男女衣著
悉如外人黃髮垂髻並怡然自樂見漁人乃大
驚問所從來具答之便要還家設酒殺雞作食
村中聞有此人咸來問訊自云先世避秦時亂
率妻子邑人來此絕境不復出焉遂與外人間
隔問今是何世乃不知有漢無論魏晉此人一
一爲具言所聞皆歎惋餘人各復延至其家皆
出酒食停數日辭去此中人語云不足爲外人
道也旣出得其船便扶向路處處誌之及郡下
詣太守說如此太守卽遣人隨其往尋向所誌
遂迷不復得路南陽劉子驥高尚士也聞之欣
然親往未果尋病終後遂無問津者

羸氏亂天紀賢者避其世黃綺之商山伊人亦云

逝往迹浸復湮來逕遂蕪廢相命肄農耕日入從
所憇桑竹垂餘蔭菽稷隨時藝春蠶收長絲秋熟
靡王稅荒路暖交通雞犬互鳴吠俎豆猶古法衣
裳無新製童孺縱行歌斑白歡游詣草榮識節和
木衰知風厲雖無紀曆誌四時自成歲怡然有餘
樂於何勞智慧竒蹤隱五百一朝敞神界淳薄旣
異源旋復還幽蔽借問游方士焉測塵囂外願言
躡輕風高舉尋吾契

詩紀卷之三十四

終

